

## यूहन्नायात जूगु दर्शन प्रकाशया सफू म्हसीका

थाय् थासय् च्वंपिं विश्वासीतयत् दुःखकष्ट वयाच्चंबलय् यूहन्नां थ्व सफू थःत जूवःगु दर्शनया बारे च्वःगु खः। यूहन्नां थ्व सफू विश्वासीतयत् आशा व साहस बीत, अले दुःख व सास्तीया इलय् नं विश्वास यायेबहःपिं जुयाच्चनेगु इनाप यायेत च्वयातःगु खः। उबलय् यूहन्नायात परमेश्वरयागु वचन व येशू धयादीगु सत्य खः धकाः न्यंकाच्चंगुलिं पत्मोस टापुइ यंकाः कुनातःगु खः।

सफूया अप्चः धया थें थासय् यूहन्नां थःत जूगु दर्शनया खँ कथंहंक व चिन्हय् क्यनातःगु दु। उबलय्यापिं विश्वासीतयसं थ्व दर्शनया अर्थ बांलाक थू। मेपिन्त धाःसा थ्व छगू गुप्ति खँ जूगुलि थुइके थाकु।

सफूया मूखँयात संगितया लय् थें थाय् थासय् थीथी दर्शनया रूपय् दोहरय् यानातःगु दु। थ्व दर्शनया अर्थ थीथी मनूतयसं थीथी कथं ब्यूसां मू खँ ला बांलाक हे सी दु – परमेश्वरं येशू ख्रीष्टयापाखें वय्कःया दक्व शत्रुतयत् व शैतानयातनापं सदांया नितिं भज्यंक नाश यानादी। अले थः विश्वास यायेबहःपिं मनूतयत् जक वय्कःयागु न्हगु स्वर्ग व न्हगु पृथ्वीइ दुकयादी।

धलः पौ

न्हय्खँ १:१-८

न्हापांगु दर्शन व न्हय्गू मण्डलीयात छवःगु पौ १:९-३:२२

न्हय्गू छाप तयातःगु भ्वंथू ४:१-८:१

न्हयपु तुरही ८:२-११:१९

अजिङ्गर व निम्ह पशु १२:१-१३:१८

थीथी दर्शन १४:१-१५:८

परमेश्वरयागु तंयागु न्हय्गः ख्वल्चा १६:१-२१

बेबिलोनया पतन १७:१-१९:२१

शैतानयागु विनाश २०:१-१०

दक्वसिबय् लिपायागु न्याय २०:११-१५

न्हगु स्वर्ग, न्हगु पृथ्वी, न्हगु यरुशलेम २१:१-२२:५

क्वचाय्कूगु २२:६-२१

## प्रकाश

1 थ्व सफुलिइ च्वयातःगु खँ परमेश्वरं येशू ख्रीष्टयात क्यनादीगु खँ खः। थः दासतय्सं छु जुइतिनि धयागु खँ थुइके फयेमा धकाः परमेश्वरं येशू ख्रीष्टयात क्यनादीगु खः। येशू थ्व खँ क्यनेत छम्ह स्वर्गदूतयात यूहन्नायाथाय् छवयादिल।

2 व हे यूहन्नां खंगु परमेश्वरं धयादीगु वचन, अले येशू ख्रीष्टं धयादीगु खँ फुक्क सत्य खः धकाः साक्षी बियाच्चवनागु दु।

3 ई न्ह्यःने थ्यने धुंकल। उकिं थ्व अगमवाणीयागु वचन ब्वपिं, न्यपिं, व मानय् याःपिं मनूत धन्यपिं खः।

न्हय्गू मण्डलीयात यूहन्नाया ज्वजलपा

4 एशियाय् दुगु न्हय्गू मण्डलीयात यूहन्नापाखें ज्वजलपा।

आः नं दीम्ह, न्हापा नं दीम्ह, अले झायादीत्यंम्ह, व वय्कःयागु सिंहासनयागु लिक्क च्वपिं न्हय्म्ह आत्मापाखें छिमित दया माया व शान्ति दयेमा।\*

5 अथे हे तुं साक्षी बियादीगु विश्वास याये बहःम्ह, सिनाः दकल्य् न्हापां म्वानावःम्ह, अले संसारय् च्वपिं जुजुतय् जुजु येशू ख्रीष्टपाखें नं छिमित दया माया व शान्ति दयेमा।

झीत माया यानादीम्ह नं वय्कः हे जूगुलि थःगु हिं झीत झीगु पापं छुतय् यानादीम्ह नं वय्कः हे खः।\*

6 वय्कलं परमेश्वर बाःयागु सेवा यायेत धकाः झीपाखें पुजाहारीतयगु छगू राज्य स्वनादिल। येशू ख्रीष्टया न्हाबलें महिमा व आदर जुयाच्चवनेमा। आमेन!\*

7 “स्व, वय्कः

सुपाँचय् झायादी तिनि,  
फुक्कसिगु मिखां खनीतिनि,  
वय्कःयात

भालां सूपिन्सं नं खनी।

अले संसारय् च्वपिं

फुक्क जातियापिं मनूत  
वय्कःयात खनाः

\* 1:4 १:४ प्रस ३:१४; प्रका ४:५

\* 1:5 १:५ यशै ५५:४; भज ८९:२७

\* 1:6 १:६ प्रस १९:६;

प्रका ५:१०

नुगः दादां ख्वये मालीतिनि।  
थथे ला जु हे जुइ। आमेन!”✧

8 दक्वसिबय् तःधंम्ह व शक्ति दुम्ह, आः नं दीम्ह व न्हापा नं दीम्ह, अले  
झायादीम्ह परमप्रभु परमेश्वरं धयादिल – “अल्फा व ओमेगा जि हे खः।”✧

येशू ख्रीष्टया दर्शन

9 छिपिलिसे येशूयागु निति दुःखकष्ट सिया च्वनाम्ह छिमि दाजु जि यहन्ना  
खः। छिपिलिसे तुं वय्कःयागु राज्यय् च्वनाः सकतां सह यानाच्वनागु दु। जिं  
परमेश्वरयागु वचन व येशू धयादीगु सत्य खः धकाः न्यंकाच्वनागुलित जितः पत्मोस  
टापुइ यंकाः कुनातल।

10 प्रभुयागु दिनय् जि आत्मां जाल। जिगु ल्युने तुरही पुया हः थें तस्सलं थथे  
धयाहःगु सः जिं ताल –

11 “छं खंगु फुक्कं सफुलिइ च्वयाः न्हयगू मण्डलीतय्त छव – एफिसस,  
स्मूर्ना, पर्गामम, थिआटीरा, सार्डिस, फिलाडेल्फिया व लाउडिकिया।”

12 थुकथं जि नाप खँ ल्हाना च्वंम्ह सु धकाः लिफः स्वयाबलय् न्हयगू लुँयागु  
त्वाःदेवा जिं खना।

13 त्वाःदेवाया दथुइ मनूया काय् थें ज्याःम्ह तुतिइ थ्यंक् वःगु पुजाहारीया लं  
फिनाः छातिइ लुँ बाला हिनातःम्ह छम्हयसित खना।✧

14 वय्कःयागु छ्यं व सँ तुयुगु ऊन व च्वापु थें तुयु। वय्कःयागु मिखा च्यानाच्वंगु  
मि थें च्वं।

15 वय्कःयागु तुति मिइ छुया दायाः तल तल थीकातःगु ली थें च्वं। अथे हे  
वय्कःयागु सः यक्व क्वब्वाःलःयागु सः थें च्वं।✧✧

16 वय्कःयागु जव लहातय् न्हयगः नगु दु। वय्कःयागु म्हुतुं तसकं ज्वःगु निखें  
धाः दुगु तरवार पिहां वयाच्वंगु दु। वय्कःयागु ख्वाः तसकं थीगु सूर्य थें च्वं।

17 वय्कःयात खनेवं जि सीम्ह थें जुयाः वय्कःयागु तुतिइ भ्वपू वना। अले  
वय्कलं जिगु छेनय् जव लहाः तयाः धयादिल – “ग्याये मते। जि शुरु व अन्त  
खः।”✧

✧ 1:7 १:७ दान ७:१३; मती २४:३०; मर्क १३:२६; लूक २१:२७; १ थेस ४:१७; जक १२:१०; यूह १९:३४,३७

✧ 1:8 १:८ प्रका २२:१३; प्रस ३:१४ ✧ 1:13 १:१३ दान ७:१३; १०:५ ✧ 1:15 १:१४-१५ दान ७:९;

१०:६ ✧ 1:15 १:१५ इज १:२४; ४३:२ ✧ 1:17 १:१७ यशै ४४:६; ४८:१२; प्रका २:८; २२:१३

18 जि म्वाःमह खः। जि सी धुनामह जूसां आः जि न्ह्याबलें म्वाणा च्वनीमह खः। मृत्यु व नरकया ताःचा जिके दु।

19 “आः छं खंगु जुयाच्वंगु खँ, अले लिपा जुइतिनिगु खँ फुक्कं च्व।

20 छं खंगु जिगु जव लहातय् दुगु न्हयगः नगुयागु व न्हयगू लँयागु त्वाःदेवाया गुप्ति खँ थ्व हे खः। न्हयगः नगुयागु अर्थ न्हयगू मण्डलीयापिं दूतत खः। अथे हे न्हयगू लँयागु त्वाःदेवायागु अर्थ न्हयगू मण्डली खः।”

## 2

एफिससय् च्वंगु मण्डलीयात

च्वःगु पौ

1 “एफिससय् च्वंगु मण्डलीयामह दूतयात थथे धकाः च्वया छव – जव लहातय् न्हयगः नगु ज्वना जूमहयसिगु व न्हयगू लँयागु त्वाःदेवायागु दथुइ जुया च्वंमहयसिनं थथे धयादीगु दु –

2 “छिमिसं दुःख सियाः यानाच्वंगु ज्याखँ, अले सह याये फक्व सह यानाच्वंगु व मभिपिं मनूतयत् छिमिसं दुनुगलंनिसें हे मययक्कूगु, व प्रेरित मखुसां प्रेरित खः धकाः धया जूपिन्त फताहा सावित यानाः क्यनाब्यगु फुक्कं जिं स्यू।

3 जिगु नांयागु निरितिं छिमिसं सकतां सह याये फक्व स्वयाः नं अप्वः सह यानाच्वंगु अझ हे नं त्यानु मचासे सह यानाच्वंगु नं जिं स्यू।

4 “अयनं छिमिसं जितः न्हापा न्हापा माया याना जू थें थौकन्हय् मयात धकाः जिं छिमित धायेमाल।

5 उकिं छिमिसं गनथाय् दुंकागु खः लुमंकाः पश्चाताप यानाः न्हापा न्हापा याःथें थौकन्हय् नं याये माल। मखुसा जि हे वयाः छिमिगु त्वाःदेवा उकिया थासं लिक्काबी। उकिं छिमिसं पश्चाताप याये हे माः।

6 अयनं निकोलाइटसतय्गु ज्याखँ छिमिगु दुनुगलंनिसें हे मयःगु ला बां हे लाः। जितः नं इपिं मयः।

7 “सुयाके न्हायपं दु वं आत्मां मण्डलीतयत् छु धयादिल धयागु न्यनाः थुइकाः का – त्याका वःपिन्त जिं परमेश्वरयागु स्वर्गय् च्वंगु जीवन बीगु सिमायागु फल नकेबी।✠

✠ 2:7 २:७ उत २:१; प्रका २२:२; इज २८:१३; ३१:८

## स्मूर्नाय् च्वंगु मण्डलीयात

च्वःगु पौ

8 “स्मूर्नाय् च्वंगु मण्डलीयाम्ह दूतयात थथे धकाः च्वया छ्व – शुरू व अन्त, अले सिनाः म्वाना वःमहय्सिनं थथे धयादी –☆

9 “छिमिसं कष्ट फयाच्वंगु व चीमि जुयाच्वंगु जिं स्यू। अयून् छिपिं ला तःमि खः। यहदी मखुसां यहदी खः धकाः धया जुइपिन्सं छिमित मभिका जूगु नं जिं स्यू। इपिं शैतान नाप मिलय् जूपिं खः।

10 दुःख वइन धकाः छिपिं गयाये मते। का स्व, शैतानं छिपिं मध्ये सुयातं इयालखानाय् कुंका बीत्यंगु दु। थुकथं छिपिं विश्वासय गुलि बल्लाःपिं खः धकाः स्वयेत्यंगु दु। झिन्हु हे जक छिमित दुःखकष्ट जुइ। सी हे माला वंसां छिमिसं जितः विश्वास यायेगु त्वःते मते, अले छिमित जीवनयागु श्रीपेच बी।

11 “सुयाके न्हाय्पं दु वं आत्मां मण्डलीतय्त छु धयादिल धयागु न्यनाः थुइकाः का – त्याःपिन्त नरकय् छ्वइ हे मखु।☆

## पर्गामिमय् च्वंगु मण्डलीयात

च्वःगु पौ

12 “पर्गामिमय् च्वंगु मण्डलीयाम्ह दूतयात थथे धकाः च्वया छ्व – तसकं ज्वःगु निखें धाः दुगु तरवार दुमहय्सिनं थथे धयादी –

13 “शैतानयागु सिंहासन दुथाय् छिपिं च्वनाच्वंगु दु धकाः जिं स्यू। छिमिसं शैतान दुगु थासय् नं जितः क्वान्तुक भक्ति व विश्वास यानाच्वंगु दु धकाः, अले जिगु साक्षी बिया जूम्ह एन्टिपासयात स्याःबलय् नं छिमिसं जितः विश्वास यायेगु मत्वःतु।

14 “अयून् जिं छिमित ब्वःबी माःगु छुं खँ दु। इस्राएलीतय्त स्यंकेत जुजु बालाकयात खँ स्यंम्ह बालामयागु बिचाः गथे खः अथे हे याना जूपिं छिमिथाय् नं सुं दु। वं इस्राएलीतय्त मूर्तियागु प्रसाद नयेगु व व्यभिचार यायेगु खँ स्यनाः स्यंकेत स्वल्।☆

15 अथे हे निकोलाइटसयागु खँ स्यना काइपिं नं छिमिथाय् दु।

16 उकिं पश्चाताप या, मखुसा जि याकनं वयाः जिगु म्हुतुइ च्वंगु तरवारं इपिं लिसे ल्वाये।

☆ 2:8 २२८ यशै ४४:६; ४८:१२; प्रकारा १:१७; २२:१३  
२:१४ गन्ती २२:५,७; ३१:१६; व्य २३:४; गन्ती २५:१-३

☆ 2:11 २:११ प्रकारा २०:१४; २१:८ ☆ 2:14

17 “सुयाके न्हायुपं दु वं आत्मां मण्डलीतयत् छु धयादिल धयागु न्यना: थुइका: का – त्या:म्हयसित जिं सुचुका तयागु मन्ना बी। अले छगू न्हगु नां च्वयात:गु तुयगु ल्वहं छग: नं बी। व का:म्हयसिनं जक थ्व नां थुइ, मेपिन्सं थुइ मखु।✧

थिआटीराय् च्वंगु मण्डलीयात च्व:गु पौ

18 “थिआटीराय् च्वंगु मण्डलीयाम्ह दूतयात थथे धका: च्वया छव – छवयाच्वंगु मि थें च्वंगु मिखा दुम्ह, अले थीगु ली थें च्वंगु तुति दुम्ह परमेश्वरया कायून् थथे धयादी –

19 “छिमिसं यानाच्वंगु ज्याखँ, जित: माया यानाच्वंगु, विश्वास यानाच्वंगु, सेवा यानाच्वंगु, अले सह यानाच्वंगु जिं स्यु। छिमिसं न्हापा न्हापा स्वया: नं आ: तसकं बांलाक ज्याखँ यानाच्वंगु दु धका: जिं नं स्यु।

20 “अयजूसां जिं धायेमा:गु छता खँ दु। थथ:म्हं तुं अगमवादिनी ख: धका: धया जुइम्ह ईजेबेल धा:म्ह मिसायात छिमिसं छुं हे मधासे तया तल। जिमि दासतयत् व्यभिचार यायेगु व मूर्तियागु प्रसाद नयेगु खँ स्यनीम्हयसित छिमिसं या:या:थे याकातये ज्यु ला?✧

21 जिं वयात पश्चाताप यायेमा धका: ईबिया तया। अयून् वं याना जूगु व्यभिचार याये मखुत धका: मधा:।

22 “उकिं आ: जिं वयात उसौय् मदयका: लासाय् प्युपुंकाबी। व नाप व्यभिचार या:पिन्सं पश्चाताप मयात धा:सा व नाप तुं इमित नं तसकं दु:खकष्टय् लाकाबी।

23 वया मस्तयत् जिं स्यानाबी। मनूतयगु मन व नुग: वातुवाला: स्वइम्ह जि हे ख: धका: अले जक फुक्क मण्डलीं सीका काइ। छिमिसं याना जूगु ज्या स्वया: जिं नं छिमित मा:गु याये।✧

24 “आ: ल्यंदनिपि थिआटीराय् च्वंपिं वयागु खँय् मजूपिं व शैतानयागु गुप्ति खँ मस्यूपिन्त जिं आ: मेगु छुं हे कु क्वबिके मखुत।

25 आ: थें तुं छिपिं जि मवतले विश्वासय् बल्लाना च्वँ।

26 “लिपा तकं जिं धा:थे यानाच्वंम्हयसित व त्याइम्हयसित जात जातियापिन्त शासन याकेबी।

27 वयकलं इमित नँयागु दण्डी शासन याइ, अले चायागु थल तळ्या: थें तळ्याइ। जित: जिमि बा:नं ब्युगु ति हे अधिकार इमित दइ।✧

✧ 2:17 २:१७ प्रस १६:१४-१५; १६:३३-३४; यूह ६:४८-५०; यशै ६२:२; ६५:१५  
१६:३१; २ राज १:२२,३० ✧ 2:23 २:२३ भज ७:१; यर १७:१०; भज ६२:१२  
२:८-९

✧ 2:20 २:२० १ राज

✧ 2:27 २:२६-२७ भज

- 28 अले जिं इमित सुथसिगु नगु नं बी।  
 29 सुयाके न्हाय्पं दु, वं आत्मां मण्डलीतयत् छु धयादिल धयागु न्यना: थुइका: का।”

### 3

सार्डिसय् च्वंगु मण्डलीयात  
 च्व:गु पौ।

1 “सार्डिसय् च्वंगु मण्डलीयाम्ह दूतयात थथे धका: च्वया छव – परमेश्वरया न्हयम्ह आत्मा व न्हयग: नगु दुम्हयसिनं थथे धयादी –

“छिमिसं यानाच्च्वंगु ज्याखँ जि स्यू। मन्तयसं छिपिं म्वानाच्च्वपिं ख: धका: बिचा: याइ, अयनं धात्थें धाये धा:सा छिपिं सीपिं ख:।

2 न्ह्यलं चायेका च्वँ, ल्यंदनिगु खँयात बल्लाका ति। मखुसा याकनं हे तनावनी। जिमि परमेश्वरया न्ह्य:ने छिमिसं याना जूगु ज्याखँ बांला: मजू धका: जिं स्यू।

3 छिमिसं न्यनागु व सयेका कयागु वचन लुमंका ति। वचनयात मानय् या, अले पश्चाताप या। छिपिं न्ह्यलं चायेका मच्चंसा जि खँव: थें वये। जि छिमिथाय् गुबलय् वइ धका: छिमिसं सी मखु।☆

4 “अथेसां सार्डिसय् गुलिखय् मन्तयसं थ:गु लं यचुकात:गु दु। थुपिं तुइसे च्वंगु वसतं पुना: जि नाप जुइतिनि, छायाधा:सा थुपिं जि नाप जुइत ल्व:।

5 थथे त्या:म्हयसित जिं तयुगु वसतं पुंकाबी। अले जिं वयागु नां जीवनयागु सफुलि गुबलें हुयाछवये मखु। जिमि बा:यागु न्ह्य:ने व वय्क:या स्वर्गदूततयगु न्ह्य:ने जिं थ्व जिम्ह मनु ख: धका: धाये।☆

6 “सुयाके न्हाय्पं दु, वं आत्मां मण्डलीतयत् छु धयादिल धयागु न्यना: थुइका: का।

फिलाडेल्फियाय् च्वंगु मण्डलीयात च्व:गु पौ

7 “फिलाडेल्फियाय् च्वंगु मण्डलीयाम्ह दूतयात थथे धका: च्वया छव –  
 “पवित्रम्ह, धात्थेंयाम्ह,

दाऊदयागु ता:चा दुम्हयसिनं थथे धयादी –  
 गुम्हयसिनं चाय्कूगु खापा सुनानं ति फइ मखु,

☆ 3:3 ३:३ मती २४:४३-४४; लूक १२:३२-४०; प्रका १६:१५  
 प्रका २०:१२; मती १०:३२; लूक १२:८

☆ 3:5 ३:५ प्रस ३२:३२-३३; भज ६९:२८;

अले तिनाब्युगु खापा चाय्के फइ नं मखु।☆

8 “छिमिसं यानाच्चंगु ज्याखँ जिं स्यू। स्व, जिं छिमिगु न्ह्यःने लुखा चाय्का बियागु दु। थ्व लुखा सुनानं ति फइ मखु। छिपिं यक्व शक्ति मद्रुपिं मनूत खःसां जितः त्वमतुसे विश्वास यानाच्चंगु दु धकाः जिं स्यू।

9 स्व, यहदीत मखुसां यहदीत खः धकाः मखुगु खँ ल्हानाजुइपिं शैतानयागु बाखं कनीगु छँय् मुनिपिन्त जिं यायेगु स्यू। स्व, जिं इमित छिमिथाय् छ्वयाहयाः छिमिगु तुति भागि याकेहये। अले जक जिं माया याना तयापिं मनूत छिपिं हे खः धकाः इमिसं सीकी।☆

10 “छिमिसं न्ह्यागु दुःखकष्ट सहयाना नं जिगु वचन मानय् यानाच्चन। उकिं जिं नं छिमित संसारय् च्वंपिं फुक्कसितं जाँचय् यायेत जू वइगु दुःखकष्टं बचय् याये।

11 जि याकनं वयेत्यनागु दु, उकिं छिमिके दुगु त्वःफिके मते। अले जक छिमित बीगु श्रीपेच सुनानं लाकाकाये फइ मखु।

12 त्याःम्हयसित जिमि परमेश्वरयागु देगःया थां यानाबी। अले अनं व गुबलें हे पिहां वनेमाली मखु। अले जिं उकी जिमि परमेश्वरयागु नां च्वयाबी, स्वर्ग जिमि परमेश्वरयागु थासं क्वहां वयाच्चंगु न्हगु यरूशलेम धाःगु शहरयागु नां व जिगु हे न्हगु नां नं उकी च्वयाबी।☆

13 “सुयाके न्हाय्पं दु, वं आत्मां मण्डलीतयूत छु धयादिल धयागु न्यनाः थुइकाः का।

लाउडिकियाय् च्वंगु मण्डलीयात च्वःगु पौ

14 “लाउडिकियाय् च्वंगु मण्डलीयाम्ह दूतयात थथे धकाः च्वया छ्व – परमेश्वरया दक्व सृष्टिया शासक, आमेन धाःम्ह, विश्वास याये बहःम्ह, खःगु खःगु जक साक्षी बीम्हयूसिनं धयादी।☆

15 “छिमिगु आनिबानि फुक्कं जिं स्यू। छिपिं न क्वा हे क्वाः, न ख्वाउँसे हे च्वं, बरु छिपिं कि क्वाःसा ज्यू कि ख्वाउँसा ज्यू।

16 छिपिं क्वा नं मक्वाः अले ख्वाउँ नं मज्ज, बरु लुमु लुमु धाःपिं जूगुलि जिं छिमित थुकलं बी।

☆ 3:7 ३:७ यशै २२:२२; अयू १२:१४ ☆ 3:9 ३:९ यशै ४९:२३; ६०:१४; ४३:४ ☆ 3:12 ३:१२ प्रका २१:२; यशै ६२:२; ६५:१५ ☆ 3:14 ३:१४ हितो ८:२२



17 छिमिसं धाःसा 'जि तःमिम्ह खः, जिके माक्वं सम्पत्ति दु, उकिं जितः छुं नं माःगु मद्' धकाः धया जुयां छु याये? तर छिपिं तसकं हे दुःख ताया च्वंपिं, माया वनापुसे च्वंपिं, चीमिपिं, कांपिं, अले पचिनांगापिं धकाः छिमिके होश मद्दुनि।

18 उकिं छिमिसं तःमि जुइत मिइ दायतःगु लुँ, अले थःगु पचिनांगागु म्हया मछाः तंकेत तयुगु लं, व मिखाय् तयेत मलम जिके न्या धकाः जिं सल्लाह बियाच्चना।

19 जिं माया यानापिन्त कजय् नं याये, ब्वः नं बी, उकिं जिगु वचन बांलाक मानय् यायेमाः व पश्चाताप नं यायेमाः।✧

20 "स्व, जिं लुखाय् दनाः सःताच्चना। सुनानं जिगु सः तायाः खापा चाय्का ब्यूसा जि दुहां वनाः व नाप नयेत्वने याये। अले वं जि नाप नयेत्वने याइ।

21 गथे जिं त्याकाः जि जिमि बाःयागु सिंहासनय् वय्कः नाप फ्यतुइ खंगु दु, अथे हे त्याम्हय्सित जिं जिगु सिंहासनय् जि नाप फ्यतुके बी।

22 "सुयाके न्हाय्पं दु, वं आत्मां मण्डलीतय्त्त छु धयादिल धयागु न्यनाः थुइकाः का।"

## 4

स्वर्गय् परमेश्वरयात तःधंकूगु

1 थुलि जुइ धुंकाः जिं थस्वयाबलय् स्वर्गया लुखा चालाच्चंगु खना। दकलय् न्हापालाक तुरही पुयाहःगु सः थें च्वंक जिं थथे धयाहःगु ताल – "थन थाहां वा, अले छु छु जुइतिनि धकाः जिं छन्त क्यने।"

2 अले जि छक्कलं आत्मां जाल। जिं स्वर्गय् छगू सिंहासन तयातःगु व उकी सुं छम्ह फ्यतुनाच्चंगु खना।

3 अन फ्यतुनाच्चंम्ह जास्पार व कार्नेलेन मणि थें खने दु। सिंहासनया जवंखवं पन्ना थें ज्याःगु इन्द्रेणी दु।✧

4 अले हानं छचाखेरं निइप्यंगू सिंहासन तयातःगु दु। लुँयागु श्रीपिच पुया तःपिं व तयुगु वसतं पुनातःपिं निइप्यम्ह थकालिपिं व सिंहासनय् फ्यतुनाच्चंगु दु।

5 सिंहासनं प्वालाक्क प्वालाक्क मि च्यानाच्चंगु, न न्याः थें सः वयाच्चंगु दु। सिंहासनया न्ह्यःने न्हय्प्याः मिप्वाः च्यानाच्चंगु दु। थ्व परमेश्वरया न्हय्म्ह आत्मा खः।✧

6 सिंहासनया न्ह्यःने न्हाय्कंयागु समुद्र थें यचुसे खने दु।

✧ **3:19** ३:१९ हितो ३:१२; हिब १२:६ ✧ **4:3** ४:२-३ इज १:२६-२८; १०:१ ✧ **4:5** ४:५ प्रस ११:१६; प्रका ८:५; ११:१९; १६:१८; इज १:१३; प्रका १:४; जक ४:२

सिंहासनया छ्चाखेरं ल्युने नं न्ह्यःने नं मिखाया मिखा दुपिं प्यम्ह जीवात्मा दु।

7 न्हापांम्ह सिंह थें च्वं, निम्हम्ह द्रहं थें च्वं, अले स्वम्हम्हयसिगु ख्वाः मनूयागु ख्वाः थें च्वं, प्यम्हम्ह ब्वया च्वंम्ह इमा थें च्वं।☆

8 थ्व प्यम्ह जीवात्मातयके खुपा खुपा पपू दु, अले दुनेपिने फुक्कभनं मिखाया मिखा दु। थुमिसं च्छि न्हिच्छिं मदिव्क थथे म्ये हालाच्चनी।

“पवित्र, पवित्र, पवित्रम्ह  
दक्वसिबय् तःधंम्ह  
व शक्ति दुम्ह  
परमप्रभु परमेश्वर।

वय्कः न्हापांनिसें दीम्ह,  
आः नं दीम्ह,  
अले लिपा नं दीम्ह खः।”☆

9 सिंहासनय् फ्यतुनादीम्ह न्ह्याबलें म्वाना च्वनीम्हयसिगु महिमा, हनाबना व सुभाय्या म्ये इपिं जीवात्मातयसं हालाच्चन।

10 इपिं म्ये हालाच्चंबलय् सिंहासनय् दीम्हयसिगु न्ह्यःने निइप्यम्ह थकालिपिन्सं क्वच्छुनाः भागि यात। अले थथःगु श्रीपेच वय्कःया सिंहासनया न्ह्यःने तयाः थथे धाल

11 “जिमि प्रभु परमेश्वर,  
छिं हे फुक्कं खँ  
सृष्टि यानादीगु खः।

छिगु इच्छा कथं हे  
फुक्कं दुगु खः,  
छिं हे सृष्टि यानादीगु खः।

उकिं परमप्रभु जिमि परमेश्वर,  
छि महिमा, हनाबना  
व शक्ति दुम्ह खः।”

## 5

चीधिकःम्ह भ्याःचा व भ्वंथू

1 सिंहासनय् फ्यतुना च्वंम्हयसिगु जव ल्हातय् दुने नं पिने नं च्वयातःगु भ्वं छथू खना। उकी न्हयथाय् छाप तयातःगु दु।✧

2 छम्ह तसकं बल्लाःम्ह स्वर्गदूतं ततसलं थथे धयाच्वंगु जिं ताया – “थ्व भ्वंथुइ तयातःगु छाप तळ्यानाः फ्यने फुम्ह सु दु?”

3 स्वर्गय्, पृथ्वीइ व पृथ्वी क्वय् नं थ्व भ्वंथू फ्यने फुम्ह व थुकी दुने स्वये फुम्ह छम्ह हे मदु।

4 थ्व भ्वंथू फ्यने फुम्ह वा स्वये फुम्ह सुं हे मदुगुलि जि तसकं हे ख्वया।

5 अले छम्ह थकालि जितः धाल – “ख्वय् मते, यहदा कुलयाम्ह सिंह, दाऊदया तःधंम्ह सन्तानं थ्व भ्वंथू फ्यनेत व थुकी च्वंगु न्हयगू छाप प्वलेत त्याकाः वये धुंकल।”✧

6 अले जिं सिंहासन, प्यम्ह जीवात्मा व थकालिपिनिगु दथुइ स्याना तये धुंक्म्ह थें च्वंम्ह छम्ह चीधिकःम्ह भ्याःचा दनाच्वंगु खना। थ्व चीधिकःम्ह भ्याःचायाके न्हयपु नेकू व न्हयगः मिखा दु। थ्व फुक्क पृथ्वीइ छ्वयाहःपिं परमेश्वरया न्हयम्ह आत्मा खः।✧

7 अले वं वनाः सिंहासनय् फ्यतुना च्वंम्हयसिगु जव ल्हातय् च्वंगु भ्वंथू काल।

8 थुकथं वं थ्व भ्वंथू काये धुंकाः प्यम्ह जीवात्मा व निइप्यम्ह थकालिपिं चीधिकःम्ह भ्याःचायागु न्ह्याःने क्वछुत। इपिं फुक्कसिके वीणा व गुँगू थनातःगु लुँयागु मकः दु। थ्व विश्वासीतयगु प्रार्थना खः।✧

9 इमिसं थथे धकाः छपु न्हगु म्ये हाल –

“थ्व भ्वंथुइ च्वंगु छाप  
तळ्यानाः छिं हे जक  
फ्यनादी फु,  
छाय्धाःसा  
छितः स्याये धुंकल,  
अले छिगु हिं परमेश्वरया लागि  
फुक्क कुलयापिं,  
फुक्क भाषां नवाइपिं,

✧ 5:1 ५:१ इज २:९-१०; यशै २९:११ ✧ 5:5 ५:५ उत ४९:१; यशै ११:१,१० ✧ 5:6 ५:६ यशै ५३:७;  
जक ४:१० ✧ 5:8 ५:८ भज १४१:२

फुक्क देशयापिं  
 व फुक्क जात जातियापिन्त  
 न्यानादिल।\*  
 10 छिं हे इमित झी परमेश्वरया  
 सेवा यायेत छगू राज्य  
 व पुजाहारीत दय्कादिल।  
 अले इमिसं संसारय् राज्य याइ।”\*

11 जिं हानं स्वयाबलय् लखंलख व करोडौं करोड स्वर्गादूततयसं सिंहासन,  
 जीवात्मा व थकालिपिनिगु चाकःछिं दनाः\*

12 थथे म्ये हाला च्वंगु खना –  
 “स्याये धुंकूम्ह चीधिकःम्ह भ्याःचा हे  
 शक्ति, धन, बुद्धि, बल,  
 महिमा, हनाबना  
 व तःधंके बहःम्ह खः।”

13 अले अन सृष्टि यानातःपि स्वर्गाय् च्वंपिं, पृथ्वी व पृथ्वी तःले व समुद्रय्  
 च्वंपिं दक्वसिनं थथे धयाच्वंगु जिं ताया –  
 “सिंहासनय् फ्यतुनाच्वंम्ह  
 व चीधिकःम्ह भ्याःचाया सदां  
 जयजय जुइमा।  
 अले न्ह्याबलें मान, इज्जत,  
 शक्ति व राज्य दयाच्वनेमा।”

14 प्यम्ह जीवात्मां धाल – “आमेन!” अले थकालिपिन्सं क्वछुनाः भागि  
 यात।

## 6

भ्याःचां न्हापांगु खगू छाप प्वःगु

1 चीधिकःम्ह भ्याःचां न्हयगू मध्ये छगू छाप प्वःगु जिं खना। अले प्यम्ह मध्ये  
 छम्ह जीवात्मां नँ न्याः थें तःसलं “वा” धाःगु जिं ताया।

\* 5:9 ५:१९ भज ३३:३; १८:१; यशै ४२:१०  
 दान ७:१०

\* 5:10 ५:१० प्रस १९:६; प्रका १:६ \* 5:11 ५:११

2 अले जिं छम्ह तुयुम्ह सल खना। थ्व सल गया च्वंम्हयसिके छगू धनु दु। वयात श्रीपेच बिल। अले व त्याकुकुं अझ त्याकेत वन।\*

3 चीधिकःम्ह भ्याःचां निगू छाप प्वःबलय् निम्हम्ह जीवात्मां “वा” धकाः धाःगु जिं ताया।

4 अले हानं प्वालाप्वाला थीक ह्याउँसे च्वंम्ह छम्ह सल पिहां वल। थ्व सल गया वःम्हयसिनं पृथ्वीइ शान्ति मदयेका बिल। अले मनूतयसं मनूतयत् स्याकेत वयात छपु ताहाकःगु तरवार नं बिल।\*

5 चीधिकःम्ह भ्याःचां हानं मेगु स्वंगू छाप प्वःबलय् हानं स्वम्हम्ह जीवात्मां थथे धाल – “वा।” अले हानं छम्ह हाकुम्ह सलयात खना। थ्व सल गया च्वंम्हयसिगु ल्हातय् छज्वः ताल्जु दु।\*

6 प्यम्ह जीवात्मातयगु दथुं थुकथं धयाहःगु सः जिं ताया – “न्हिच्छि ज्या याइम्हयसित छगू किलो छ्वचुं ज्यालाबीमाः। अले त्छ्व काइम्हयसित जूसा स्वंगु किलो ज्यालाबीमाः। चिकं व दाखमघयात धाःसा स्यंके मते।”

7 हानं प्यंगू छाप प्वःबलय् प्यम्हम्ह जीवात्मां थथे धाःगु जिं ताया – “वा।”

8 अले जिं म्हासुसे च्वंम्ह छम्ह सलयात खना। थ्व सल गया च्वंम्हयसिगु नां मृत्यु खः। उकिं नरक धाःम्ह वयागु ल्यूल्यु वःगु खः। इमित पृथ्वीयागु प्यब्वय् छब्व तरवारं पालेगु, नये मखंकाः स्यायेगु, ल्वचं स्यायेगु, अले जंगलय् च्वंपिं पशतयसं स्याकेगु अधिकार बिल।\*

9 न्यागू छाप प्वःबलय् जिं परमेश्वरयात मत्वःतुसे वयक्ःयागु वचन न्यंकूगुलि स्याःपिनिगु आत्मातयत् होम यायेगु थाय्यागु तःले खना।

10 थुपिं तसकं हाला हल – “शक्ति दुम्ह, पवित्रम्ह व सत्यम्ह परमप्रभु, पृथ्वीइ च्वंपिन्त छिं गुबलय् जिमित स्याःगु पलेसा कायेत न्याय यानादीगु?”

11 अले इपिं फुक्कसितं छपाः छपाः तुयुगु लं बिल। इपिं थें तुं स्याके मानिपिं परमेश्वरया दासत व इमि दाजुकिजापिन्त नं मस्यातले पिचाच्वं धकाः इमित धाल।

12 हानं खगू छाप प्वःगु जिं खना। अबलय् तसकं हे भ्वखाय् ब्वल। हाकुगु भांगु थें सूर्य हाकुसे च्वना वन। तिमिला छपातं हि थें ह्याउँसे च्वना वन।\*

13 ग्वःफसं पाकय् मजूनिगु यःमरि कुतुं वंकु थें आकाशय् च्वंगु नगु नं पृथ्वीइ कुतुंवल।

\* 6:2 द२२ जक १:८; ६:३,६ \* 6:4 द२४ जक १:८; ६:२ \* 6:5 द२५ जक ६:२,६ \* 6:8 द८ इज १४:२१ \* 6:12 द२२ प्रका ११:१३; १६:१८; यशै १३:१०; योए २:१०,३१; ३:१५; मती २४:२९; मर्क १३:२४-२५; लूक २१:२५

14 भ्वंथू तुला वं थें आकाश नं थूतुला वन। पहाडत व टापुत फुक्कं चिला वन।☆

15 अले पृथ्वीइ च्वंपिं जुजुपिं, ततःधंपिं मनूत, सेनापतित, तःमिपिं, बल्लाःपिं, दास व दासमखुपिं, फुक्कं गुफा व तःग्वःगु ल्वहंया कापिचाय् सुचूवन।☆

16 इमिसं पहाड व तःग्वःगु ल्वहंयात थथे धाल – “सिंहासनय् फ्यतुना च्वंम्हयसिगु मिखां सुचुकाः व चीधिकःम्ह भ्याःचायागु तं फये म्वायेक जिमित ल्हाका छवयाब्बु।☆

17 छायाधाःसा वयकलं न्याय व सजॉय याइगु दि वये धुंकल, उकिं सु जक बचय् जुयाः च्वने फइ?” ☆

## 7

छगू लाख व पिइप्यद्रः मनूत

1 अनं लिपा सिमा, समुद्र व पृथ्वीइ फय् वने मजीक प्यम्ह स्वर्गदूतत पृथ्वीयागु प्यंगू कुन्चाय् च्वनाः फय् प्वाः तिनाच्वंगु जिं खना।☆

2 म्वाःम्ह परमेश्वरयागु छाप ज्वनाः सूर्य लुइगु थासं थाहां वयाच्वंम्ह छम्ह स्वर्गदूतयात जिं खना। अले वं समुद्र व पृथ्वीयात स्यंकेगु अधिकार बियातःपि प्यम्ह स्वर्गदूततय् तसकं हालाः थथे धाल।

3 “इी परमेश्वरया दासतयगु कपालय् छाप मततले सिमा, समुद्र, व पृथ्वीयात स्यंके मते।”☆

4 इस्त्राएलया फुक्क कुलं छगू लाख व पिइप्यद्रः मनूतय् छाप तःगु जिं ताया।

☆ **6:14** ६:१३-१४ यशै ३४:४; प्रका १६:२० ☆ **6:15** ६:१५ यशै २:१९,२१ ☆ **6:16** ६:१६ होशे १०:८; लूक २३:३० ☆ **6:17** ६:१७ योए २:११; मला ३:२ ☆ **7:1** ७:१ यर ४९:३६; दान ७:२; जक ६:५ ☆ **7:3** ७:३ इज १:४-६

5 यहदाया कुलं	१२,००० म्ह,
स्बेनया कुलं	१२,००० म्ह,
गादया कुलं	१२,००० म्ह,
6 आशेरया कुलं	१२,००० म्ह,
नप्तालीया कुलं	१२,००० म्ह,
मनश्शेया कुलं	१२,००० म्ह,
7 शिमियोनया कुलं	१२,००० म्ह,
लेवीया कुलं	१२,००० म्ह,
इस्साखारया कुलं	१२,००० म्ह,
8 जबूलनया कुलं	१२,००० म्ह,
योसेफया कुलं	१२,००० म्ह,
बेन्यामीनया कुलं	१२,००० म्ह।

फुक्क जात जातियापिं मनूत

9 थुलि जुइ धुंका: जिं स्वयाबलय् जात जातियापिं मनूत, कुल कुलयापिं मनूत व फुक्क देश देशयापिं मनूत, थीथी भाषां नवाइपिं मनूत तुयुगु वसतं पुना: ल्हातिइ ताय्ग: सिमायागु कचा ज्वना: सिंहासन व चीधिक:म्ह भ्या:चाया न्ह्य:ने दनाच्चंगु जिं खना।

10 इपिं थुकथं तत:सलं हाल –

“सिंहासनय् फ्यतुनादीम्ह  
झी परमेश्वरयाके  
व चीधिक:म्ह भ्या:चायाके हे जक  
मनूतयत् उद्धार यायेगु  
अधिकार दु।”

11 फुक्क स्वर्गदूतत सिंहासन, थकालिपिं व प्यम्ह जीवात्मातय्गु चाक:छिं दनाच्चन। थुपिं फुक्कसिनं सिंहासनयागु न्ह्य:ने भागियाना: थथे धका: परमेश्वरयात त:धंकल।

12 “आमेन! परमेश्वरयागु  
प्रशंसा, महिमा, ज्ञान,

सुभाय, मान, शक्ति व बल  
न्हाबलें दयाचवनेमा। आमेन!”

13 अले छम्ह थकालि जितः थथे धाल – “थ्व तुयुगु वसतं फिनातःपि सु खः,  
अले इपिं गनं वःपिं खः धकाः छं स्यू ला?”

14 “प्रभु, छिं जक स्यू” धकाः जिं वयात लिसः बिया। अले वय्कलं धयादिल  
– “तसकं तःधंगु दुःखकष्ट सहयाना वःपिं मनूत इपिं हे खः। इमिसं चीधिकःम्ह  
भ्याःचायागु हि थथःगु वसः हियाः थथे तुयुसे च्वंका तःगु खः।☆

15 “उकिं हे ला खः नि,  
आः परमेश्वरया  
सिंहासनया न्हाःने च्वनाः

चच्छिं न्हिच्छिं  
देगलय् हे च्वनाः वय्कःया  
सेवा यानाच्च्वनी।  
सिंहासनय् दीम्हय्सिनं हे  
इमिगु दथुइ च्वनाः  
रक्षा यानादी।

16 अन इमित गुबलें हे  
नयेपित्याइ मखु,  
प्याः चाइ नं मखु।

निभालं व गुगुं क्वाःजलं  
इमित पुइ मखु।☆

17 सिंहासनयागु दथुइ च्वंम्ह  
चीधिकःम्ह भ्याःचा हे  
इमित ज्वइम्ह जुइ।

अले इमित वय्कलं हे गुबलें  
मसुइगु बुंगाःचाय्  
व्वना यंकादी।

अले परमेश्वरं हे  
इमिगु मिखाय् च्वंगु



ख्वबि ह्यादी।”☆

## 8

न्हयगूगु छाप व लुँयागु

गुँगू थनीगु वेदी

1 चीधिकःम्ह भ्याःचां न्हयगूगु छाप प्वःबलय् बाघौ तक स्वर्गय् सुनसान जुल।

2 अले परमेश्वरया न्ह्यःने दनाच्चंपि न्हय्म्ह स्वर्गदूततयत् जिं खना। इमित न्हयपु तुरही बिल।

3 मेम्ह छम्ह स्वर्गदूत ल्हातिइ लुँयागु गुँगू थनीगु मकः ज्वनाः वेदीया लिक्क दं वल। विश्वासीतयगु प्रार्थनालिसें सिंहासनया न्ह्यःने च्वंगु लुँयागु वेदीइ च्याकेत धकाः वयात यक्व गुँगू बिल।☆

4 विश्वासीतयसं याःगु प्रार्थना नापनापं स्वर्गदूतयागु ल्हातिइ च्यानाच्च्वंगु गुँगूया कुँत्याः च्वय् थाहां वनाच्च्वन।

5 अले स्वर्गदूतं गुँगू मकः कयाः उकी वेदीइ च्वंगु मि जाय्क तयाः पृथ्वीइ वान्छवया हल। अले ग्राङ्गुङ्ग सः वल प्वालाक्क पिंलाक हावलासा त्वल। अले हानं भ्वखाय् ब्वल।☆

न्हयपु तुरही पुयाहःगु

6 थुलि जुइ धुंकाः न्हयपु तुरही ज्वनाच्चंपि न्हय्म्ह स्वर्गदूततयसं तुरही पुइत्यन।

7 न्हापांम्ह स्वर्गदूतं तुरही पूबलय् हि ल्वाकज्याःगु प्वें व मि पृथ्वीइ वान्छवया हल। अले स्वब्बय् छब्ब पृथ्वी च्यात, स्वब्बय् छब्ब सिमा नं च्यात, अले वाउँगु घाँय् नं फुक्क च्यानाः वन।☆

8 निम्हम्ह स्वर्गदूतं थःगु तुरही पुल। अले दनदन मि च्यानाच्च्वंगु पहाड थें ज्याःगु छुं छगू समुद्रय् वान्छवया हल। स्वब्बय् छब्ब समुद्र हि जुल।

9 अले समुद्रय् च्वंपि स्वब्बय् छब्ब जीवजन्तुत नं सित। स्वब्बय् छब्ब लःजहाज नं स्यन।

10 हानं स्वम्हम्ह स्वर्गदूतं थःगु तुरही पुल। अले ला मिप्वाः थें च्यानाः तःग्वःगु नगु छगः आकाशं कुतुं वयाः स्वब्बय् छब्ब खुसि व बुंगाःचाय् लात।☆

☆ **7:17** ७:१७ भज २३:१-२; इज ३४:२३; यशै ४९:१०; २५:८ ☆ **8:3** ८:३ आमो ९:१; प्रस ३०:१,३

☆ **8:5** ८:५ लेवी १६:१२; इज १०:२; प्रस १९:१६; प्रका ११:१९; १६:१८ ☆ **8:7** ८:७ प्रस ९:२३-२५; इज

३८:२२ ☆ **8:10** ८:१० यशै १४:१२

11 ध्व नगुयागु नां “खायु” खः। अले थुकिं यानाः स्वब्बय् छब्ब लः खाइसे च्वना वन। थथे लः खाइसे च्वना वंगुलि व लखं यानाः यक्व हे मनूत सित।✧

12 अले प्यम्हम्ह स्वर्गदूतं थःगु तुरही पुल। स्वब्बय् छब्ब सूर्य व स्वब्बय् छब्ब तिमिला व स्वब्बय् छब्ब नगुयात स्यंका ब्यूगुलि स्वब्बय् छब्ब न्हि खिउँसे च्वना वन, स्वब्बय् छब्ब चा नं अथे हे जुल।✧

13 थुलि जुइ धुंकाः जिं आकाशय् ततसलं थथे हालाः ब्वया च्वंम्ह छम्ह इमायात खना। “आवनिसें पृथ्वीइ च्वंपिन्त तसकं धिक्कार, धिक्कार, धिक्कार, छायाधाःसा अझ नं स्वम्ह स्वर्गदूततयसं थथःगु तुरही पुयाहइतिनि।”

## 9

1 अले न्याम्हम्ह स्वर्गदूतं थःगु तुरही पुल। अबलय् छगः नगु स्वर्ग पृथ्वीइ कुतुं वःगु जिं खना। वयात तसकं तःजाःगु गाःयागु ताःचा बिल।

2 अले वं व तसकं हे तःजाःगु गाः चायकूबलय् तसकं च्वानाच्वंगु भट्टिं कुँत्याः वः थें वःगुलि सूर्य व आकाश छुं हे खने मदय्क खिउँगुलि त्वपुल।✧

3 ध्व कुं पृथ्वीइ क्वःबुइँचात पिहां वल। इमित पृथ्वीइ च्वंपि बिच्छितयगु थें ज्याःगु शक्ति बिल।✧

4 पृथ्वीइ च्वंगु घाँय्, सिमा व वाउँगु छुं नं स्यंके मते धकाः इमित धाल। तर कपालय् परमेश्वरयागु छाप मद्रुपिं मनूतयत् जक कष्ट ब्यु धकाः इमित धाल।✧

5 इमित स्यायेत हे ला मखु, न्याला तक सह याये हे मफय्क सास्ती बीत अधिकार बियातःगु दु। इमित सास्ती जुइबलय् बिच्छिं न्याः थें जुइ।

6 थुबलय् मनूत सीत सनी, अयनं सी फइ मखु। इमिसं सीत कुतः याःसां काल इपिं खनाः बिस्सुं वनी।✧

7 ध्व क्वःबुइँचात लडाइँलय् वनेत्यंपिं सल थें च्वं। इमिगु छेनय् लुँयागु श्रीपेच थें च्वंगु खने दु। इमिगु ख्वाःपाः मनूतयगु ख्वाःपाः थें च्वं।✧

8 इमिगु सँ नं मिसातयगु सँ थें ताहा। इमिगु वा नं सिंहयागु वा थें च्वं।✧

9 इमिगु छातिइ नँयागु पातां चिनातःगु थें च्वं। इमिगु पपू संकूबलय् वःगु सः ला लडाइँलय् यक्व सलं सालीगु रथयागु सः थें च्वं।✧

✧ 8:11 ८:११ यर १:१५ ✧ 8:12 ८:१२ यशै १३:१०; इज ३२:७; योए २:१०,३१; ३:१५ ✧ 9:2 ९:२ उत १९:२८ ✧ 9:3 ९:३ प्रस १०:१२-१५ ✧ 9:4 ९:४ इज ९:४ ✧ 9:6 ९:६ अयू ३:२१; यर ८:३ ✧ 9:7 ९:७ योए २:४ ✧ 9:8 ९:८ योए १:६ ✧ 9:9 ९:९ योए २:५

10 इमिगु न्हिप्यं व कं बिच्छियागु थें च्वं। इमिगु न्हिप्यनय् मनूतयत् न्याला तक सास्ती बियातयगु शक्ति दु।

11 तसकं तःजाःगु गाःयाम्ह दूत इमि जुजु थें खः। वयागु नां हिब्रू भाषां एबाड्डोन, अले ग्रीक भाषां अपोल्लियोन खः।

12 थुकथं न्हापांगु विपत्ति फुत, अयनं निगू विपत्ति ला ल्यं हे दनि।

13 अले खुम्हम्ह स्वर्गदूतं थःगु तुरही पुल। परमेश्वरयागु न्ह्यःने च्वंगु लुँयागु गुँगू थनेगु वेदीया प्यंगू नेकुति थुकथं तुरही पूम्ह खुम्हम्ह स्वर्गदूतयात धयाहःगु सः जिं ताल -☆

14 “यूफ्रेटिस खुसिइ चिनातःपि प्यम्ह दूततयत् फ्यना ब्यु।”

15 अले वं प्यम्ह दूततयत् फ्यना बिल। स्वब्बय् छब्ब मनूतयत् स्यायेत थ्व हे घौ, न्हि, ला व दँया लागि तयार यानातःपि थुपि हे खः।

16 इमिगु सल गया वनीपिनिगु फौज २०,००,००,००० (निङ्गू करोड) दु धाःगु जिं न्यना।

17 जिं दर्शनय् सल व सल गया च्वंपि खना। सल गया च्वंपिनिगु छातिइ नँयागु पातां चिनातःगु दु। थुकियागु रंग मि थें ह्याउँसे, निलम थें वँचुसे व गन्धक थें म्हासुसे च्वं। सलतयगु छ्यं सिंहतयगु थें च्वं। इमिगु म्हुतुं मि, कुँ, व गन्धक पिहां वयाच्वंगु दु।

18 इमिगु म्हुतुं पिहां वयाच्वंगु नाश याइगु मि, कुँ व गन्धकया विपत्तिं स्वब्बय् छब्ब मनूतयत् स्यानाबिल।

19 छायाधाःसा सलतयगु शक्ति इमिगु म्हुतुइ व न्हिप्यनय् जुयाच्वन। इमिगु न्हिप्यं सर्पयागु छ्यं थें च्वं। थुकि हे इमिसं मनूतयत् न्यानाः स्याइ।

20 थुकि मस्याःपि मनूतय्सं अझ नं थःगु ल्हाति याःगु ज्यायागु पश्चाताप मयाः। इमिसं भूतयात पुजा यायेगु व लुँ, वहः, सिजः, ल्वहं व सिँयागु मूर्तियात पुजा यायेगु मत्वःतू। थ्व घःतयसं मखं, मताः, अले न्यासि जुइ मफु।☆

21 अले इमिसं मनू स्यायेगु, जादु क्यनेगु, व्यभिचार यायेगु व खुइगु ज्याया पश्चाताप मयाः।

## 10

स्वर्गदूत व चिथुगु भ्वं

1 अले हानं सुपाँचं हिनातःम्ह, छेनय् इन्द्रेणी दुम्ह, सूर्ययागु थें ख्वाः दुम्ह, मियागु थां थें च्वंगु तुति दुम्ह तसकं बल्लाःम्ह छम्ह स्वर्गदूत स्वर्गं क्वहां वयाच्वंगु जिं खना।

2 वयागु ल्हातिइ चिथुगु भवं छथू फ्यना तःगु दु। वं थःगु जव तुतिं समुद्रय् व खव तुतिं बैय् चुल।

3 अले सिंह हाःथें ततसलं व हाल। थथे व हाःगुलि न्हय्कः नँ न्याये थें ग्राङ्गगुङ्ग मिक सः वल।

4 थथे न्हय्कः नँ न्याये थें सः वये धुंकाः जिं च्वय् त्यनाबलय् स्वर्गं थथे धयाहःगु सः ताल – “न्हय्कः नँ न्याः थें वःगु सःयागु खँ सुयातं कने मते, अले च्वये नं मते।”

5 बैय् व समुद्रय् तुतिं चुयाः दनाच्वंम्ह स्वर्गदूतं थःगु ल्हाः स्वर्गय् ल्हनाः

6 स्वर्गं व स्वर्गय् च्वंगु फुक्कं, पृथ्वी व पृथ्वीइ च्वंगु फुक्कं, समुद्र व समुद्रय् च्वंगु फुक्कं सृष्टि यानादीम्ह न्ह्याबलें म्वाना च्वनीम्हय्सिगु नामय् पाफल। वं धाल – “आः लिबाइ मखुत।”

7 न्हय्म्हम्ह स्वर्गदूतं थःगु तुरही पुइबलय् परमेश्वरं न्हापांनिसें वय्कःया दास अगमवत्कातयत् कनातःगु वय्कःयागु गुप्ति खँ नं पूवंकादी।☆

8 स्वर्गं हानं थथे धयाहःगु जिं ताल – “हूँ, समुद्रय् व बैय् पलाः तयाः दनाच्वंम्ह स्वर्गदूतयागु ल्हातिइ दुगु फ्यना तःगु चिथुगु भवं का।”

9 अले जिं वनाः “व चिथुगु भवं जितः बियादिसँ” धकाः व स्वर्गदूतयात धया। अले वं जितः थथे धाल – “का, थ्व न। थ्व नयेबलय् प्वाथय् तसकं खाइसे च्वनी, म्हतुइ धाःसा कस्ति थें चाकुसे च्वनी।”

10 अले स्वर्गदूतयागु ल्हातिइ च्वंगु चिथुगु भवं कयाः जिं नयाबिया। नयाबलय् म्हतुइ कस्ति थें चाकुसे च्वन, अले प्वाथय् थयंबलय् तसकं हे खाइसे च्वना वल।☆

11 अले वं जितः धाल – “हानं छकः यक्व देश देशयापि मनूतयत्, जात जातियापि मनूतयत्, थीथी भाषां नवाइपि मनूतयत् व जुजु जुजुपिन्त नं छं अगमवाणी कने मानि।”

## 11

### निम्ह साक्षी

1 अले जितः नापय् यायेगु थें ज्याःगु तिकथि छपु बियाः थथे धाल – “दँ, परमेश्वरयागु देगः, व वेदी नापय् या। अले अन वयाः आराधना याइपिं ल्याःखा।✧

2 देगः पिने च्वंगु चुकय् धाःसा नापय् याये मते, छायाधाःसा व ला यहदीमखुपिन्त बी धुन। इमिसं थ्व पवित्रगु शहरयात पिइनिला तक न्हुतुन्हया तइ।✧

3 अले जिं जिमि निम्ह साक्षी बीपिन्त भांग्रायागु वसतं पुंकाः द्रःछि व निसः व खुइन्हु तक अगमवाणी कनेगु शक्ति बी।”

4 इपिं जैतूनयागु निमा सिमा व पृथ्वीयाम्ह प्रभुयागु न्ह्यःने थनातःगु निपु त्वाःदेवा खः।✧

5 सुनानं इमित सास्ती यायेत वल धाःसा इमिगु म्हुतुं मि पिहां वयाः इमि शत्रुतयत् नाश यानाबी। सुं मनू इमित स्यंकेत वल धाःसा वयात नं अथे हे यानाः स्यानाबी।

6 इमिके अगमवाणी कनाच्चंगु इलय् वा मवयमा धकाः आकाश हे तिनाबीगु शक्ति दु, हानं लःयात हि यानाबीगु शक्ति नं दु। इमित यःबलय् पृथ्वीइ न्ह्याथें ज्याःगु ल्वय् हयेगु अधिकार नं इमिके दु।✧

7 इमिसं बीमाःगु साक्षी बीधुंकाः तसकं तःजाःगु गालं थाहां वःम्ह पशुं इपिनापं ल्वानाः इमित स्यानाबी।✧

8 इमि प्रभुयात कूसय् यख्खाःगु तःधंगु शहरय् च्वंगु लँय्सं इमिगु सीम्ह अथें लानाच्चनी। मेकथं धायेगु खःसा थ्व शहर सदोम व मिश्र देश थें च्वंगु खः।✧

9 देश देशयापिं मनूतय्सं, कुल कुलयापिं मनूतय्सं, थीथी भाषां नवाइपिं मनूतय्सं व जात जातियापिं मनूतय्सं इमिगु सीम्ह स्वन्हु व बान्हु तक स्वयाच्चनी। इमिसं सीम्ह थुंके बी मखु।

10 अबलय् पृथ्वीइ च्वंपिं मनूत फुक्कं इपिं सीगुलि लयल्यताइ। थ्व निम्ह अगमवक्तातय्सं यानाः पृथ्वीइ च्वंपिन्त तसकं सास्ती जुयाच्चंगुलि इपिं लयल्यतातां थःथवय् कोसेलि बीगु याइ।

11 स्वन्हु व बान्हु दये धुंकाः परमेश्वरं छवयाहयादीगु हंस इमिके दुहां वन। अले इपिं तृति च्याः जुस्क्क दन। इमित खंपिं फुक्कं तसकं ग्यात।✧

12 अले इमिसं स्वर्ग थथे धयाहःगु सः ताल – “थन थाहां वा।” इमि शत्रुतय्सं खंक खंक हे इपिं सुपाँचय् च्वनाः स्वर्गय् थाहां वन।✧

✧ 11:1 ११:१ इज ४०:३; जक २:१-२ ✧ 11:2 ११:२ लूक २१:२४ ✧ 11:4 ११:४ जक ४:३,११-१४  
 ✧ 11:6 ११:६ १ राज १७:१; प्रस ७:१७-१९; १ शमू ४:८ ✧ 11:7 ११:७ दान ७:७,२१; प्रका १३:५-७;  
 १७:८ ✧ 11:8 ११:८ यशै १:९-१० ✧ 11:11 ११:११ इज ३७:१० ✧ 11:12 ११:१२ २ राज २:११

13 अबलय् हे तसकं भवखाय् ब्वल। झिब्वय् छब्व शहर दुनावन। भवखाय् ब्वःबलय् न्हयद्रः मनूत सित। ल्यंदनिपिं मनूत फुक्क ग्यानाः स्वर्गय् च्वंम्ह परमेश्वरयात तःधंकल।☆

14 निगूगु विपत्ति फुत। स्वंगूगु विपत्ति याकनं हे वयेत्यंगु दु।

न्हयगूगु तुरही

15 अले न्हयम्हम्ह स्वर्गदूतं थःगु तुरही पुल। अले स्वर्ग तस्सलं थथे धयाहल

“संसारयागु राज्य झी प्रभु

व वय्कःया ख्छीष्टयागु  
राज्य जुल।

वय्कलं सदांया निंति

राज्य यानादी।”☆

16 परमेश्वरयागु न्ह्यःने थथःगु सिंहासनय् फ्यतुना च्वंपिं निइप्यम्ह थकालिपिंसं क्वच्छुनाः परमेश्वरयात थथे धकाः तःधंकल –

17 “न्हापा दीम्ह,

आः नं दीम्ह,

दक्वसिबय् तःधंम्ह

व शक्ति दुम्ह

परमप्रभु परमेश्वर

जिमिसं छितः सुभाय्

देछाया च्वना।

छिं हे छिगु तःधंगु शक्ति

ज्वनाः राज्य यानादिल।

18 जात जातियापिं मनूत

छि खनाः

तसकं तंम्वय्कल।

आः छिगु तं पिकायेगु ई वल,

अले सीपिन्त न्याय यायेगु।

छिकपिनि दास

अगमवत्काततयत्  
 व विश्वासीतयत्,  
 छितः मानय् यानाचर्वपि  
 तःधंपि व चिधंपि  
 फुक्कसितं सिरपाः बीगु  
 व पृथ्वीयात स्यंकूपिन्त  
 न्हकेगु ई नं वये धुंकल।” ☆

19 अले स्वर्गय् च्वंगु परमेश्वरया पवित्र देगः चाल। अन बाचा चिनातःगु सनू खनेदत। अले झिलिक्क झिलिक्क हावलासा च्यात, ततसलं ग्यानापुक ग्राङ्गगुङ्ग सः वल। भ्वखाय् व्वल, तसकं प्वं गात। ☆

## 12

### मिसा व अजिङ्गर

1 अनलि स्वर्गय् तसकं तःधंगु छगू चिं खनेदत। अन सूर्ययागु वसः पुनातःम्ह, तिमिलाया च्वय् तुति तयातःम्ह, झिनिगः नगुयागु श्रीपेच पुया तःम्ह छम्ह मिसायात जिं खना।

2 व मिसा प्वाथय् दुम्ह जूगुलि मचाबुङ्गु ब्यथा सह याये मफयाः तसकं हाला च्वंगु खः।

3 हानं मेगु छगू चिं स्वर्गय् खनेदत। छम्ह तसकं ग्यानापुसे च्वंम्ह, ह्याउंसे च्वंम्ह, न्हयगः छयं, झिपु नेक् व न्हयगः छेनय् श्रीपेच दुम्ह अजिङ्गरयात खना।☆

4 वयागु न्हिप्यनं आकाशय् स्वव्वय् छव्व नगुयात बै पुइ थें पुयाः पृथ्वीइ कुर्का हल। व अजिङ्गर बुइत्यंम्ह मचायात नयेत प्वाथय् दुम्ह मिसाया न्ह्यःने पिवाः च्वनाच्वन।☆

5 अले व मिसां जात जातियापिन्त नँयागु दण्डी राज्य याइम्ह छम्ह मिजंमचायात बुइकल। व मिसां बुइकूम्ह मचा परमेश्वर च्वनादीथाय् वय्कःयागु सिंहासन दुथाय् बिसिके यंकल।☆

6 अले व मिसा मरुभूमिइ परमेश्वरं दय्का तयादीगु थासय् बिस्युं वन। अन हे व मिसायात द्रुःछि व निसः व खुइन्हु तक लहिना तयादिल।

☆ 11:18 ११:१८ भज २:५; ११:०५; ११:५:१३ ☆ 11:19 ११:१९ प्रका ८:५; १६:१८-२१ ☆ 12:3 १२:३ दान ७:७ ☆ 12:4 १२:४ दान ८:१० ☆ 12:5 १२:५ यशै ६६:७; भज २:९

7 अनं लिपा स्वर्ग्य लडाइँ जुल। मिखाएल धाःम्ह स्वर्गदूत व वया दूतत, अजिङ्गर व वया दूतत नाप ल्वात।☆

8 अजिङ्गर व वया दूतत बूगुलि इमित स्वर्ग्य च्वनेगु थाये मन्त।

9 अले व तसकं ग्यानापुसे च्वंम्ह अजिङ्गरयात क्वय् क्वफाना हल। फुक्क संसारय् च्वंपिन्त थगय् याइम्ह पुलांम्ह सर्प व हे खः। वयात दुष्ट व शैतान धकाः नं धाः। वयात व वया दूततय्त पृथ्वीइ वान्छवया हल।☆

10 अले स्वर्गपाखें थथे धयाहःगु छगू तस्सःगु सः जिं ताया –  
“आः परमेश्वरं झीत  
उद्गार यानादी।

परमेश्वरं अधिकार क्यनाः  
ख्रीष्टयात राज्य याकादिल।

चान्हे झी परमेश्वरया न्ह्यःने  
झी दाजुकिजापिनिगु  
विरोध यानाः  
दोष बीत स्वइम्हयसित  
क्वफाना हये धुंकल।☆

11 चीधिकःम्ह भ्याःचायागु हिं व इमिसं  
न्यंकूगु वचनं यानाः  
इमिसं वयात बुकाबिल।

इपिं सीत तकं लिमच्यु।

12 उकिं स्वर्ग व स्वर्ग्य च्वंपि  
फुक्कं लयताः।

अयनं पृथ्वी व समुद्रयात  
धिक्कार, छायाधाःसा  
तसकं तं पिकयाः  
शैतान छिमिथाय् वःगु दु।

वयागु ई अप्वः मन्त धकाः  
स्यूगुलि वं थथे याःगु खः।”

13 थथे पृथ्वीइ वान्छवया हःगुलि अजिङ्गरं मचा बुइक्म्ह मिसायात लिनाजुल।

☆ 12:7 १२:७ दान १०:१३,२१; १२:१; यह ९  
१२:१० अयू १:९-११; जक ३:१

☆ 12:9 १२:९ उत ३:१; लूक १०:१८

☆ 12:10



14 उर्कि व मिसायात अजिङ्गरया न्ह्यःनं मरुभूमिइ बिस्सुं वनेत तसकं तःधिकःम्ह इमायागु निपा पपू छुनाबिल। अन हे व मिसायात स्वदँ व खुला लहिना तल।✧

15 व मिसायात चुइके छवयेत व अजिङ्गरं थःगु म्हतुं खुसि थें लः पिकाल।

16 पृथ्वी व मिसायात बचय् यायेत थःगु म्हतु चाय्काः अजिङ्गरं पिकाःगु लः फुक्क त्वनाछवत।

17 अले व मिसा खनाः झन तसकं तंम्वल। उर्कि वया सन्तान, परमेश्वरयागु आज्ञा मानय् यानाच्चंपिं व येशूयागु वचन सत्य खः धकाः धाइपिं नाप ल्वायेत अजिङ्गर वन।

18 अले व समुद्रयागु सिथय् दनाच्चन।

## 13

समुद्रं पिहांवःम्ह पशु

1 अले जिं झिपु नेकू व न्हयगः छ्यं दुम्ह पशु समुद्रं पिहां वयाच्चंगु खना। वयागु नेकू पतिकं श्रीपेच दु। वयागु छ्यं पतिकं परमेश्वरयात सराः बीगु नां च्वयातःगु दु।✧

2 व पशु चितुवा थें च्वं। वयागु तुति भालुयागु, म्हतु सिंहयागु थें च्वं। अले वयात हे अजिङ्गरं थःगु शक्ति, थःगु सिंहासन व तःधंगु अधिकार बिल।✧

3 वयागु छगः छेनय् सी थें च्वंक घाः यानातःगु दु। अयनं थ्व घाः लना वन। उर्कि अजू चायाः संसारय् च्वंपिं फुक्क मनूत व पशुया ल्यूल्यू वन।

4 सकलें मनूतयसं अजिङ्गरयात पुजा याइगु खः। अले व अजिङ्गरं थःगु अधिकार पशुयात बिल। अथे जुयाः मनूतयसं थथे धयाः पशुयात नं पुजा यात — “थ्व पशु थें ज्याःम्ह सु दु? थ्व पशुनाप सु ल्वाये फइ?”

5 अले पशुयात घमण्डी खँ ल्हाइगु व परमेश्वरयात हेस्यानाः खँ ल्हाइगु छप्वाः म्हतु बिल। पिइनिला तक व पशुयात अधिकार याकेबिल।

6 अले परमेश्वरयात क्वह्यंकेत, वय्कःया नां व च्वनेगु थाय् अले स्वर्गय् च्वंपिं फुक्कसितं हेस्यानाः खँ ल्हायेत वं थःगु म्हतुप्वाः चाय्कल।✧

7 वयात विश्वासीतनाप ल्वायेगु व इमित बुकेगु अधिकार बिल। फुक्क कुलयापिं मनूतयत्, देश देशयापिं मनूतयत्, थीथी भाषां न्वाइपिं मनूतयत् व जात जातियापिं मनूतयत् नं व पशुयात अधिकार याकेबिल।✧

✧ 12:14 १२:१४ दान ७:२५; १२:७ ✧ 13:1 १३:१ दान ७:३; प्रका १७:३,७-१२ ✧ 13:2 १३:२ दान ७:४-६ ✧ 13:6 १३:५-६ दान ७:८,२५; ११:३६ ✧ 13:7 १३:७ दान ७:२१

8 अले पृथ्वीइ च्वंपि फुक्कसिनं व पशुयात पुजा याइ। संसारयागु सृष्टि जूसांनिसें स्याःम्ह चीधिकःम्ह भ्याःचाया जीवनयागु सफलुइ नां च्वया मतःपिं फुक्कसिनं वयात पुजा याइ।☆

9 सुया न्हाय्पं दु वं न्यना का।

10 ज्वना यंके माःपिन्त  
ज्वना हे यंकी।

तरवारं सीमाःपिं तरवारं हे सी।

थुबलय हे खः सकल विश्वासीतयसं विश्वास मत्वःतुसे सह यानाच्चनेमाःगु।☆

पृथ्वीं पिहांवःम्ह पशु

11 जिं हानं पृथ्वीं पिहां वयाच्चंम्ह छम्ह मेम्ह पशुयात खना। चीधिकःम्ह भ्याःचायागु थें वयाके निपु नेक् दु। वं नवाःगु अजिङ्गरं नवाःगु थें च्वं।

12 न्हापांयाम्ह पशुयागु न्ह्यःने हे वयागु फुक्क अधिकार थ्व पशुं कयाः चले यात। सी थें च्वंक घाः जुयाः नं लाःम्ह न्हापांयाम्ह पशुयात पृथ्वी व पृथ्वीइ च्वंपि फुक्कसिनं पुजा याकेत थ्व पशुं कर यात।

13 थ्व मनूतयसं खंक खंक हे आकाशं पृथ्वीइ मि गाय्केगु थें ज्याःगु तसकं हे अजू चायापुगु चिं यानाक्यन।

14 न्हापांयाम्ह पशुयागु न्ह्यःने हे वयात अथे चिं क्यनेगु अधिकार ब्यगुलि पृथ्वीइ च्वंपिन्त थ्वं ध्वंलायेगु याना जुल। तरवारं पालाः घाः जुलं हे म्वानाच्चंम्ह न्हापांयाम्ह पशुयागु मूर्ति दय्कि धकाः फुक्कसितं उजं बिल।

15 न्हापांयाम्ह पशुयागु मूर्तियात नवाकेत सास तयाबीगु व वयात पुजा मयाःपिन्त स्यायेगु अधिकार व पशुयात बियातःगु दु।

16 अले वं तःधंपिन्त, चिधंपिन्त, तःमिपिन्त, चीमिपिन्त, दासतयत्, दास मखुपिन्त फुक्कसितं नं कपालय वा जव लहातय चिं तय्कल।

17 थ्व चिं मटुपि सुनानं न्याये नं दइ मखु, अले मी नं दइ मखु। थ्व चिं व पशुयागु नां धाःसां ज्यु, ल्याः धाःसां ज्यु।

18 थ्व थुइकेत बुद्धि माः। सुयाके बुद्धि दु वं थ्व पशुयागु ल्याःयागु अर्थ थुइका काइ। थ्व ल्याः मनूयागु नां खः। थ्व ल्याः ६६६ खः।

## 14

चीधिकःमह भ्याःचा व छगू लाख व पिइप्यद्रः मनूत

1 अले जिं सियोन पर्वतय् चीधिकःमह भ्याःचा दनाच्चंगु खना। वय्कः व वय्कःया बाःयागु नां कपालय् च्वयातःपिं छगू लाख व पिइप्यद्रः मनूत वय्कः नाप दु।\*

2 अले यक्व लःयागु सः व तसकं नँ न्याःगु सः थें च्वंक स्वर्ग धयाहःगु छगू तःधंगु सः जिं ताल। थ्व सः यक्व वीणा थाःगु सः थें नं च्वं।

3 सिंहासन, प्यम्ह जीवात्मा, व थकालिपिनिगु न्ह्यःने च्वनाः इमिसं छपु न्हगु म्ये हालाच्चन। पृथ्वी मू पुलाः लिफ्याना हःपिं छगू लाख व पिइप्यद्रः मनूतय्सं जक व म्ये हाले सः, मेपिन्सं मसः।

4 थुपिं मिस्तनापं लसपस मजूनिपिं च्वखपिं खः। थुपिं चीधिकःमह भ्याःचायागु जक ल्यूल्यू जुइपिं खः। परमेश्वर व चीधिकःमह भ्याःचायागु लागि संसारं लिफ्याना हःपिं दकलय् न्हापायापिं मनूत, थुपिं हे खः।

5 इमिगु म्हुतुइ मखुगु खँ धयागु मदु, इमिगु नुगः यचुसे च्वं।\*

स्वम्ह स्वर्गदूत

6 अले छम्ह स्वर्गदूत आकाशं आकाशं ब्वया जूगु जिं खना। वं पृथ्वीइ च्वंपिं फुक्क जातियापिं मनूतयत्, कुलयापिं मनूतयत्, थीथी भाषां नवाइपिं मनूतयत्, व देश देशयापिं मनूतयत् न्यंकेत न्ह्याबले दयाच्चनीगु भिगु खँ ज्वना वयाच्चंगु दु।

7 वं ततसलं थथे धाल – “परमेश्वर खनाः ग्या। वय्कःयात तःधंकि। वय्कलं मनूतयत् न्याय याइगु ई वये धुंकल। स्वर्ग, पृथ्वी, समुद्र व लःयागु बुंगाः सृष्टि यानादीम्हयसित आराधना या।”

8 वयागु ल्यूल्यू वःम्ह मेम्ह स्वर्गदूतं थथे धाल – “नाश जुल, तःधंगु शहर बेबिलोन नाश जुल। थःम्हं याःगु बांमलाःगु ज्या मेमेगु देशयापिं मनूतयत् नं याकेब्युम्ह थ्व हे शहर खः।”\*

9 हानं वया ल्यूल्यू वःम्ह स्वम्हम्ह स्वर्गदूतं ततसलं थथे धाल – “सुनानं पशुयात व वयागु मूर्तियात पुजा याःसा, वयागु कपालय्, अथवा ल्हातय् चिं तयेका च्वंसा,

\* 14:1 १४:१ इज ९:४; प्रका ७:३    \* 14:5 १४:५ सप ३:१३    \* 14:8 १४:८ यशै २९:९; यर ५१:८; प्रका १८:२

10 अज्याःपिन्सं परमेश्वरयागु तःधंगु तं छुनं ल्वाकछ्याना मतःगु ख्वल्चां त्वने माली। अज्याःपिन्सं मि व गन्धक दुथाय् पवित्रपि स्वर्गदूततयगु व चीधिकःम्ह भ्याःचायागु न्ह्यःने च्वनाः सास्ती नया च्वनेमाली।\*

11 इमिसं सास्ती नया च्वंथासं वःगु कुं न्ह्याबलें च्वय् थाहां वनाच्वनी। इमिसं चच्छि न्हिच्छि दुःखसिया च्वनेमाली। व पशुयात व वयागु मूर्तियात पुजा याक्वसित, अले हानं वयागु नांयागु चिं काक्वसित नं अथे हे याइ।\*\*

12 परमेश्वरयागु आज्ञा मानय् याइपि व येशू ख्रीष्टयात विश्वास याना मत्वःतूपि विश्वासीतयसं सह याः कि मयाः धकाः थुकिं हे सी दइ।

13 अले हानं जिं स्वर्गं थथे धयाहःगु सः ताल – “थ्व खँ च्व, आर्वनिसें प्रभुयात विश्वास यानाः सीपिं मनूत धात्थे हे धन्यपिं खः।” आत्मां नं धयादिल – “धात्थे खः, आः इमिसं थःगु ज्यां झासु लने खनी, छायाधाःसा इमिगु ज्यायागु फल इमिगु ल्यूल्यु वयाच्वनी।”

### पृथ्वीइ बाली लयेगु ई

14 अले हानं जिं तुयगु सुपाँय् खना। छेनय् लुँयागु श्रीपेच दुम्ह, ल्हातिइ ज्वःगु ईचा ज्वनातःम्ह मनूया काय थें च्वंम्ह छम्हयसित सुपाँचय खना।\*

15 सुपाँचय च्वंम्हयसित देगलं पिहांवःम्ह छम्ह स्वर्गदूतं थथे धकाः ततसलं धाल – “पृथ्वीइ च्वंगु बाली बांलाक पाकय् जुइ धुंकल, बाली लयेगु ई जुइ धुंकूगुलि ईचां बाली लयादिसँ।\*\*

16 अले सुपाँचय च्वंम्हयसिनं पृथ्वीइ ईचा संकल, अले पृथ्वीइ बाली लये सिधल।

17 हानं मेम्ह हे छम्ह स्वर्गदूत स्वर्गय् च्वंगु देगलं पिहां वल। वयाके नं ज्वःगु ईचा दु।

18 मेम्ह छम्ह स्वर्गदूत होम यायेगु थासं पिहां वल। थ्वयाके मियागु अधिकार दु। अले ज्वःगु ईचा दुम्हयसित थ्वं ततसलं धाल – “पृथ्वीइ च्वंगु दाख ईचां लया का, दाख पाकय् जुइ धुंकल।”

19 अले व स्वर्गदूतं थःगु ईचा पृथ्वीइ संकल। अले दाख लयाः मुंकल। थ्व यंकाः परमेश्वरयागु तंयागु तःधंगु दाख तिस्सिगु थासय् वांछवत।

\* 14:10 १४:१० यशै ५१:१७; उत १९:२४; इज ३८:२२

\* 14:11 १४:११ यशै ३४:१०

\* 14:14

१४:१४ दान ७:१३

\* 14:15 १४:१५ योए ३:१३

20 शहरं पिने यंकाः दाख तिसिल। दाख तिस्यूबलय् सलयागु गःपः तक जायाः स्वसः किलोमिटर तक हि बाः वन।☆

## 15

न्हय्म्ह स्वर्गदूत व न्हय्ग् महामारी

1 जिं हानं स्वर्गय् तसकं हे तःधंगु अजू चायापुगु छगू चिं खना। न्हय्म्ह स्वर्गदूततयसं दकलय् लिपायागु न्हय्ग् महामारी कयातल। परमेश्वरयागु तं थुमिगुपाखें हे क्वचाइ।

2 अले जिं मि ल्वाकज्याःगु न्हाय्कंयागु समुद्र थें खना। पशु, वयागु मूर्ति व वयागु नांयागु ल्याःयात त्याकाः परमेश्वरं बियादीगु वीणा कयातःपिन्त जिं न्हाय्कंयागु समुद्रय् दनाच्चंगु खना।

3 परमेश्वरया दास मोशां च्वयातःगु म्ये व चीधिकःम्ह भ्याःचायागु छपु म्ये इमिसं थुकथं हाल –

“दक्वसिबय् तःधंम्ह व

शक्ति दुम्ह परमप्रभु परमेश्वर,

छिं यानादीगु ज्या

तसकं तःधं व अजू चायापु।

जाति जातिया जुजु,

छिगु लँपु सत्य व पाय्छि जु।☆

4 हे परमप्रभु, सु जक

छि खनाः मग्याइ?

सुनां जक छिगु नांयात तःधं

धकाः मानय् मयाइ?

छि हे जक पवित्रम्ह खः।

छिगु पाय्छिगु बिचाः

व न्याय फुक्कसिनं

सी धुंकूगुलि

फुक्क जातित छिथाय्

छितः आराधना यायेत वइ।”☆

☆ 14:20 १४:२० यशै ६३:३; विलाप १:१५; प्रका १९:१५

☆ 15:3 १५:३ प्रस १५:१

☆ 15:4

१५:४ यर १०:७; भज ८६:९

5 अनलि जिं स्वर्गय् परमेश्वरया देगः चालाः अन दुने च्वंगु महा-पवित्र थाय् खन।☆

6 यचुसे व थीगु तुयुगु वसः फिनातःपिं अले छातिइ लुँयागु बालां हिनातःपिं न्हय्म्ह स्वर्गदूतत देगलं न्हय्गू महामारी ज्वनाः पिहां वःगु जिं खना।

7 अले व प्यम्ह मध्ये छम्ह जीवात्मां न्ह्याबलें म्वाना च्वनीम्ह परमेश्वरयागु तं जायक दुगु न्हय्गः लुँयागु ख्वल्चा न्हय्म्ह स्वर्गदूततयत् बिल।

8 परमेश्वरयागु महिमा, हनाबना व शक्तिं पिहां वयाच्वंगु कुं देगः छगलं जाल। न्हय्म्ह स्वर्गदूततयसं छव्याहःगु न्हय्गू महामारी सिमधःतले अन सुं नं दुहां वनेमफु।☆

## 16

परमेश्वरया तं दुगु न्हय्गः ख्वल्चा

1 अले जिं देगलं न्हय्म्ह स्वर्गदूततयत् तस्सलं थथे धयाच्वंगु ताल – “हुँ, परमेश्वरयागु तं दुगु न्हय्गः ख्वल्चा पृथ्वीइ प्वंकि।”

2 अले न्हापांम्ह स्वर्गदूतं वनाः थःगु ख्वल्चा पृथ्वीइ प्वंकल। थुकिं यानाः पशुयागु छाप दुपिं व पशुयागु मूर्ति पुजा याइपिं मनूतय्गु म्हय् घच्चाइपुगु व सह याये मफय्क स्याइगु कै वल।☆

3 निम्हम्ह स्वर्गदूतं थःगु ख्वल्चा समुद्रय् प्वंकाबिल। अले व समुद्रयागु लः सीम्ह मनूयागु हि थें जुयाः समुद्रय् च्वंपिं प्राणीत फुक्कं सित।

4 स्वम्हम्ह स्वर्गदूतं थःगु ख्वल्चा खुसि व बुंगाःचाय् प्वंकल। अले फुक्क लः हि जुल।☆

5 अले लःयागु बिचाः याइम्ह दूतं थथे धाःगु जिं ताल –

“हे पवित्रम्ह परमेश्वर,

न्हापांनिसें दीम्ह,

आः नं दीम्ह छि हे खः।

छिं न्याय यानादीगु

तसकं पाय्छि जू।

6 छायाधाःसा छितः

☆ 15:5 १५:५ प्रस ३८:२१ ☆ 15:8 १५:८ प्रस ४०:३४; १ राज ८:१०-११; २ इति ५:१३-१४; यशै ६:४

☆ 16:2 १६:२ प्रस १:१० ☆ 16:4 १६:४ प्रस ७:१७-२१; भज ७८:४४

विश्वास याःपि मनूतयत्  
 व अगमवक्तातयत्  
 स्याःपि थुपि हे खः।

उकिं छिं थुमित हि त्वंकादिल।  
 इपि थथे हे यायेमाःपि खः।”

7 अनं लिपा वेदी थथे धयाहःगु सः जिं ताल,

“दक्वसिबय् तःधंम्ह  
 व शक्ति दुम्ह  
 परमप्रभु परमेश्वर,

छिं यानादीगु न्याय  
 सत्य व पाय्छि जू।”

8 प्यम्हम्ह स्वर्गदूतं थःगु ख्वल्चा सूर्ययात प्वंकाबिल। थुकथं सूर्ययागु मि थें  
 ज्याःगु तापं मनूतयत् पुकेबिल।

9 तसकं तांन्वयाः मनूतयत् पुत। थथे दुःखकष्ट छ्वयाहयेगु अधिकार दुम्ह  
 परमेश्वरयागु नां कयाः इमिसं सराः बिल। अयून् इमिसं पश्चाताप मयाः अले  
 परमेश्वरयात नं तःमधंक्।

10 न्याम्हम्ह स्वर्गदूतं थःगु ख्वल्चा पशुयागु सिंहासनय् प्वंकल। अले वयागु  
 राज्य खिउँसे च्वना वन। दुःखकष्ट सह याये मफयाः मनूतयसं वा न्ह्यल।\*

11 थुकथं कै वयकाः सास्ती नका तःगुलि इमिसं स्वर्गय् च्वंम्ह परमेश्वरयात  
 सराः बिल। इमिसं थःपिन्सं याना जूगु मभिंगु ज्यायागु पश्चाताप मयाः।

12 खुम्हम्ह स्वर्गदूतं थःगु ख्वल्चा तःधंगु यूफ्रेटिस खुसिइ प्वंकल। अले  
 पुर्बयापिं जुजुपिं वये जीक खुसिया लः सुनावन, लँ दत।\*

13 अले अजिङ्गर, पशु व फताहा अगमवक्तायागु म्हुतुं स्वम्ह ब्यांचा थें ज्याःपि  
 मभिंपिं आत्मात पिहां वःगु जिं खना।

14 अजू चायापुगु चिं यायेफुपिं भूत आत्मात थुपि हे खः। दक्वसिबय् तःधंम्ह व  
 शक्ति दुम्ह परमेश्वरयागु तःधंगु दिनय् ल्वायेत थुमिसं सारा संसारय् च्वपिं जुजुपिन्त  
 मुंका जुइ।

15 “होश यानाच्चँ, जि खुँ थें वये। मधंसे न्हलं चाय्का च्वंमह धन्यमह खः। वसः ज्वना च्वंमह धात्थें धन्यमह खः, छायाःसा इपि नांगां जुइ माली मखु। अले थःगु नांगांगु म्ह कर्पिन्त क्यने माली मखु।”☆

16 हिब्रू भाषां आर-मागेड्वेन धाइगु थासय इमिसं जुजुतयत् छथाय् मुंकल।

17 न्हय्महम्ह स्वर्गदूतं थःगु ख्वल्चा फसय् प्वंकल। परमेश्वरया देगःया सिंहासनं थथे धकाः तसलं धयाहल – “आः सिधल।”

18 अले अन न न्यात, हावलासा त्वल, तसकं भ्वखाय् ब्वल। मनूतयगु सृष्टि जूसानिसें थपाय्सकं तःधंगु व ग्यानापुगु भ्वखाय् गुबले हे मब्वःनि।☆

19 तःधंगु शहर स्वक् दला वन। देश देशय् च्वंगु शहर फुक्कं दुनावन। अले परमेश्वरं तःधंगु बेबिलोन शहरयात लुमंकादिल। अले वय्कःयागु ग्यानापुसे च्वंगु तंयागु ख्वल्चा वयात त्वनेत बियादिल।☆

20 दक्व टापु तनावन। पहाड धयागु हे मदयावन।☆

21 पिइगु पिइगु किलो ति दुगु ततःग्वःगु प्वँ आकाशं कुतुं वयाः मनूतयत् लात। थज्याःगु प्वँ वयाः तसकं महामारी लाःगुलिं मनूतय्सं परमेश्वरयात सराः बिल, छायाःसा थ्व तसकं हे तःधंगु ग्यानापुगु महामारी खः।☆

## 17

नांजाःम्ह वेश्या

1 न्हय्गः ख्वल्चा ज्वनातःम्ह स्वर्गदूत मध्ये छम्ह स्वर्गदूतं वयाः जितः थथे धाल – “थन वा, यक्व लः दुथाय् च्वंमह नांजाःम्ह वेश्यायात याःगु न्याय जिं छन्त क्यनाबी।”☆

2 व हे नाप संसारयापिं जुजुपिन्सं व्यभिचार याना जगु खः। सारा पृथ्वीइ च्वंपिं मनूतय्सं व नाप भाःपी हे मफय्क व्यभिचार याना जुल।”☆

3 जि पवित्र आत्मां जाल, अले स्वर्गदूतं जितः मरुभूमिइ क्वबिया यंकल। अन तसकं ह्याउँसे च्वंमह पशु गया च्वंमह छम्ह मिसायात जिं खना। व पशुयाके न्हय्गः छ्यं व झिपु नेक् दु। म्हय् जाय्क परमेश्वरयात सराः बीगु नां च्वयातःगु दु।☆

☆ 16:15 १६:१५ मती २४:४३-४४; लूक १२:३९-४०; प्रका ३:३ ☆ 16:18 १६:१८ प्रका ८:५; ११:१३,१९

☆ 16:19 १६:१९ यशै ५१:१७ ☆ 16:20 १६:२० प्रका ६:१४ ☆ 16:21 १६:२१ प्रस ९:२३; प्रका

११:१९ ☆ 17:1 १७:१ यर ५१:१३ ☆ 17:2 १७:२ यशै २३:१७; यर ५१:७ ☆ 17:3 १७:३ प्रका

१३:१



4 व मिसां तसकं थिकेगु ह्याउंसे, वँचुसे च्वंगु वसतं पुनातःगु दु। व लुँ, हिरा, मोतीया तिसां म्ह छम्हं तिया तःगु दु। वयागु व्यभिचार याःगु घच्चायापुसे च्वंगु व मभिंंगु खं जाःगु छगः लुँयागु ख्वल्चा वं ल्हातय कयातःगु दु।\*

5 वयागु कपालय गुप्त अर्थ दुगु नां च्वयातःगु दु – “तःधंगु बेबिलोन, वेश्यातय मां, अले पृथ्वीइ घच्चायापुसे च्वंगु ज्याखँ यानाजुइपिनि मां।”

6 अले जिं व मिसां येशूयात विश्वास याःपिं पवित्रपिं मनूतयगु हिं कायकाजूगु खनाः जि छक्क जुल।

7 अले स्वर्गदूतं जितः धाल – “छाय् छक्क जुया? व मिसायागु गुप्त खँ जि छन्त कने। व मिसां गया च्वंमहयसिके दुगु न्हयगः छ्यं व झिपु नेकू दुम्ह पशुयागु अर्थ नं कनाबी।

8 व पशु न्हापा ला दुम्ह खः, आः मदु। व हे पशु तःजाःगु गालं पिहां वइतिनि। अले नाश नं जुइतिनि। संसारयात सृष्टि याये न्ह्यःनिसें जीवनयागु सफलइ नां च्वया मतःपिं मनूत व पशुयात खनाः तसकं छक्क जुइ, छायाःसा व पशु न्हापा दु, आः मदु, अले लिपा वइतिनि।\*

9 “थ्व खँ थुइकेत ज्ञान बुद्धि माः। न्हयगः छ्यंया अर्थ न्हयगू पहाड खः। गुकी व मिसा फ्यतुनाच्वंगु दु। थुपिं न्हयम्ह जुजुपिं खः।

10 इपिं मध्ये न्याम्ह जुजु सी धुंकल छम्ह जक दनि। मेम्ह आः तक वःगु मदुनि। व वल धाःसा वं छुं ई तक जक राज्य याइ।

11 “न्हापा दुम्ह, आः मदुम्ह पशु थ्व हे च्याम्हम्ह जुजु खः, थ्व न्हयम्ह मध्ये छम्ह खः। थ्व नाश जुयावनी।

12 छं खंगु झिपु नेकूयागु अर्थ आः तक जुजु मजूनिपिं झिम्ह जुजुपिं खः। अयनं व पशुनाप नाप तुं इपिं छुं ई तक जक जूसां जुजु जुइतिनि।\*

13 थुपिं फुक्कसिनं छप्यँ जुयाः थःपिनिगु अधिकार व शक्ति व पशुयात बी।

14 थुपिं चीधिकःम्ह भ्याःचा नाप ल्वाः वइ। चीधिकःम्ह भ्याःचां शुमित लुका छवइ, छायाःसा वय्कः प्रभुतय नं प्रभु व जुजुतय नं जुजु खः। वय्कः नाप दुपिं सःतातःपिं, ल्ययातःपिं व विश्वास यायेबहःपिं खः।”

15 अले स्वर्गदूतं जितः हानं धाल – “छं खंगु मिसाया लिक्क दुगु लःयागु अर्थ देश देशयापिं मनूत, जात जातियापिं मनूत व थीथी भाषां नवाइपिं मनूतयगु हुल खः।

☆ 17:4 १७:४ यर ५१:७

☆ 17:8 १७:८ दान ७:७; प्रका ११:७; भज ६९:२८

☆ 17:12 १७:१२

16 छं खंगु झिपु नेकुतिं व पशुं थ्व वेश्यायात हेला याइ। इमिसं व मिसायात नांगां याइ। अले वयागु ला नइ, अले वयात मिइ उनाछवइ।

17 परमेश्वरयागु इच्छा पूर्वकेत इपिं छप्पेँ जुयाः वयक्ःया वचन पूमवंतले इमिसं थःगु अधिकार व पशुयात बी, छायाधाःसा थ्व इच्छा परमेश्वरं हे इमिगु नुगलय् तयादीगु खः।

18 छं खंम्ह मिसायागु अर्थ संसारय् च्वंपिं जुजुपिन्त राज्य याइगु तःधंगु शहर खः।”

## 18

### बेबिलोन नाश जूगु

1 थुलि जुइ धुंकाः जिं स्वर्गं क्वहां वयाच्वंम्ह मेम्ह स्वर्गदूतयात खना। व स्वर्गदूतयाके तःधंगु अधिकार दु। वयागु जलं पृथ्वी हे झल्लल थित।

2 व ततसलं थथे धकाः हाला हल —

“तःधंगु बेबिलोन शहर

नाश जुल, नाश जुल!

थ्व थाय् ला आः भूतत च्वनीगु

थाय् जुइ धुंकल।

मभिपिं आत्मात,

घच्चायापुसे च्वंपिं झंगःत

च्वनीगु थाय् जुइ धुंकल।☆

3 छायाधाःसा वयागु

व्यभिचारयागु ख्वल्चां

त्वंगुलि फुक्क जात

जातियापिं मनूत

नाश जुइ धुंकल।

पृथ्वीयापिं जुजुपिन्सं

व नापु व्यभिचार यात।

वयागु गुबले हे पूमवनीगु

इच्छां यानाः

संसारयापिं व्यापारीत

तसकं हे धनी जुल।”☆

☆ 18:2 १८:२ यशै १३:२१; २१:१; यर ५०:३९; ५१:८; प्रका १४:८

☆ 18:3 १८:३ यशै २३:१७; यर ५१:७

4 अले जिं स्वर्गं थथे धयाहःगु मेगु सः ताल –  
 “जि यःपि मनूत,  
 वयाथासं पिहां वा।  
 मवल धाःसा छिमिसं नं  
 व नाप व्यभिचार याइ।  
 वलिसे पाप याये मते,  
 मखुसा छिमिसं वलिसे तुं  
 सजाँय फयेमाली।☆

5 वं याःगु पाप  
 आकाश तक थ्यंगु दु।  
 वं याःगु पाप  
 परमेश्वरं लुमंकादीगु दु।☆

6 वं छिमित  
 गथे यानातःगु खः  
 छिमिसं नं  
 वयात अथे हे या।  
 वं याःगु ज्या सिबय्  
 निदुगं अप्वः  
 वयात छिमिसं नं या।  
 छिमित त्वंकेत ख्वल्चाय्  
 तयाब्यगु सिबय्  
 निदुगं अप्वः कडागु  
 वयागु ख्वल्चाय् तयाब्यु।☆

7 वं थथःम्ह तुं तःधं जुयाः  
 गुलि मोज यात,  
 उलि हे छिमिसं नं वयात  
 दुःखकष्ट व ख्वबि ब्यु।  
 वयागु मनं थथे धाः  
 ‘जि ला महारानी  
 जुयाच्चवनागु दु।  
 जि विधवा मिसा मखु।

☆ 18:4 १८:४ यशै ४८:२०; यर ५०:८; ५१:६,४५  
 १८:६ भज १३७:८; यर ५०:२९

☆ 18:5 १८:५ उत १८:२०-२१; यर ५१:९

☆ 18:6

जिं गुबलें हे नं

दुखं च्वनेमाली मखु।’

8 उकिं छन्हूं हे वयात ल्वय,

दुःख, आपत,

अले अनिकाल वइ।

अले वयात मिइ उनाछवइ,

छाय्धाःसा वयात न्याय

यानादीम्ह परमप्रभु

परमेश्वर शक्ति दुम्ह खः।”☆

9 व नाप व्यभिचार यानाः मोजमज्जा याना जूपि संसारयापिं जुजुपि वयात  
उनातःगु कुँ खनाः नुगः मछिंकाः ख्वइ।

10 वयात जूगु आपत बिपत खनाः ग्यानाः इमिसं तापाकं दनाः थथे धाइ –

“धिक्कार, धिक्कार

तसकं तःधंगु शहर!

तसकं बल्लाःगु शहर

बेबिलोन! घौछिं हे

छं सजाँय फये माल।”☆

11 संसारयापिं व्यापारीत नं इमिगु माल न्याइपिं मनूत मन्त धकाः नुगः मछिंकाः  
ख्वइ।☆

12 इमिगु मालताल – लुँ, वहः, हिरा, मोती, भिंगु भिंगु कापः, प्याजी रंगया  
कापः, रेसम, ह्याउँसे च्वंगु कापः, थीथी कथंया नस्वाःगु सिं, किसियागु वा,  
थिकेथिकेगु सिं, कँय, नँ, व दुसूल्वहँतं दयकातःगु थीथी सामान, व☆

13 दालचिनि, मसला, धुपाँय, मूर, गुँगु, तुयुगु धुपाँय, दाखमघ, भिंगु चिकं,  
नचुगु छवचुं, छव, सा द्रहं, फै-च्वलय, सल व रथ, दास दासी, व मनूतनापं आः  
सुनानं न्याइ मखुत।

14 व्यापारीतयसं थथे धाइ –

“हे बेबिलोन! छं ययकूगु

ततःधंगु मालताल

☆ 18:8 १८:७-८ यशै ४७:७-९ ☆ 18:10 १८:९-१० इज २६:१६-१७ ☆ 18:11 १८:११ इज २७:३१,३६

☆ 18:12 १८:१२ इज २७:१२,१३,२२

फुक्कं तनावन।  
छंगु धनसम्पत्ति व इज्जत  
फुक्कं तनावने धुंकल।  
आः हानं गुबले लुइ मखुत।”

15 अन शहरय् व्यापार यानाः धनी जूपिं मनूत वयात जूगु सास्ती खनाः ग्यानाः तापाकं हे दनाः नुगः मछिकाः ख्वख्वं थथे धाइ – ☆

16 “धिक्कार, धिक्कार  
हे तःधंगु शहर!  
भिंगु भिंगु सूती कापः, प्याजी  
रंगयागु कापतं पुना च्वंम्ह,  
लुँ, हिरा, मोती तिसां  
तिया च्वंम्ह छ हे खः!

17 घौछिं हे थुलिमछि सम्पत्ति  
फुक्क  
छ्यालब्याल जुयाः वन।”

फुक्क लःजहाजया कप्तानत, जहाजय् यात्राय् वंपिं मनूत, जहाज चले याइपिं, समुद्रय् व्यापार याइपिं फुक्कं ग्यानाः तापाकं हे च्वनाः☆

18 अले व तःधंगु शहर च्यानाः कुँ थाहां वयाच्चंगु खनाः थुकथं हाला हल –  
“थ्व थें तःधंगु शहर गनं हे दइ मखु।”☆

19 ह्वाँय् ह्वाँय् ख्वख्वं छैनय् धू बुतुबुलाः नुगः मछिकाः इपिं थथे धकाः हाल –  
“धिक्कार, धिक्कार,  
व तःधंगु शहर!

समुद्रय् जहाज चले याइपिं  
फुक्कं वयागु धनं यानाः  
तःमि जुल।

घौछिं हे व शहर नाश जुयाः वन।☆

20 हे स्वर्गय् च्वंपिं मनूत,  
व नाश जूगुलि लयत्ता!

☆ 18:15 १८:१५ इज २७:३१,३६ ☆ 18:17 १८:१७ इज २७:२६-३० ☆ 18:18 १८:१८ इज २७:३२

☆ 18:19 १८:१९ इज २७:३०-३४

हे परमेश्वरया मनूत, प्रेरितत  
 व अगमवक्तात लयता।  
 छिमित गथे याःगु खः  
 वयात परमेश्वरं अथे हे  
 न्याय यानादिल।”☆

21 अले छम्ह तसकं बल्लाःम्ह स्वर्गदूतं तसकं तःग्वःगु घःल्वहं थें ज्याःगु छगः  
 ल्वहं कयाः समुद्रय वान्छवया हल। अले थथे धाल –  
 “थुकथं हे तःधंगु बेबिलोन  
 शहर नचुक वांछवइ।  
 अले गुबलें हे  
 वयात लुइके फइ मखु।☆

22 अले वीणा, म्ये, बाँसुरी  
 व तुरहीयागु सः  
 अन गुबलें हे न्यनेदइ मखु।

कःमितयसं दयकातःगु सामान नं  
 अन लुइके फइ मखु।  
 घःक्यःगु सः नं  
 अन गुबलें हे ताये दइ मखु।☆

23 मतयागु जः नं  
 अन गुबलें थी मखुत।  
 भम्चा व जिलाजंपिनिगु सः  
 अन गुबलें ताये दइ मखुत।

छन्थाय् व्यापार याःवइपि  
 फुककं पृथ्वीयापि  
 ततःधंपि मनूत खः।

छंगु तन्त्रमन्त्रं जात जातियापि  
 मनूतयत् झंगः लानाः  
 थगय् याना तल।☆

24 अगमवक्तातयगु,

☆ 18:20 १८:२० व्य ३२:४३; यर ५१:४८ ☆ 18:21 १८:२१ यर ५१:६३-६४; इज २६:२१ ☆ 18:22  
 १८:२२ इज २६:१३; यशै २४:८ ☆ 18:23 १८:२२-२३ यर ७:३४; २५:१०

परमेश्वरया मनूतयगु  
व पृथ्वीइ स्याःपिनिगु हि  
अनं लुया वःगुलि  
बेबिलोन थुकथं नाश जुल।”☆

## 19

स्वर्गय् छुत्काराया म्ये

1 अनं लिपा जिं स्वर्ग यक्व मनूत हाला  
हःथेंज्याःगु सः ताल,

“हल्लेलूयाह,  
उद्धार, मान व शक्ति  
झी परमेश्वरयागु हे खः।

2 वय्कलं बांलाक व खःकथं  
न्याय यानादी।

पृथ्वीयापिं फुक्क मनूतयत  
थःनाप व्यभिचार याकाः  
स्यंकूम्ह व तःधंम्ह वेशयायात  
वय्कलं सजाँय बियादीगु दु।

वय्कलं थः दासतयगु हियागु  
पलेसा कयादीगु दु।”☆

3 इमिसं हानं छकः तसलं थथे धाल —  
“हल्लेलूयाह,

व वेशयायात उनातःगु कुँ  
न्हाबलेँ थाहां वनाच्चनी।”☆

4 अले नीप्यम्ह थकालिपिं व प्यम्ह जीवात्मा फुक्कसिनं भवसुलाः सिंहासनय्  
फ्यतुनादीम्ह परमेश्वरयात थथे धकाः आराधना यात — “आमेन, हल्लेलूयाह।  
प्रभुयागु नां तःधं जुयाच्चनेमा।”

5 सिंहासनं थथे धकाः धयाहल —  
“वय्कःया दासत,

वय्कःयागु भय काइपि,  
तःधंपि, चिधंपि फुक्कसिनं,  
झी परमेश्वरयात तःधकेमाः।”✧

भ्याःचायागु ब्याहा

6 अनं लिपा हुल हुल मनूतयगु सः थें, यक्व लःयागु सः थें, ग्राङ्गगुङ्ग मिक्  
न न्याःगु सः थें थथे धकाः हाला हःगु जिं ताल —  
“हल्लेलूयाह,

दक्व शक्ति दुम्ह

झी परमप्रभु परमेश्वरं

राज्य यानादी।✧

7 झी सकसिनं लयल्लयतायाः

महिमा व हनाबना बियाः

वय्कःयात तःधके नु।

चीधिकःम्ह भ्याःचायागु ब्याहा जुइन।

वय्कःया भम्चा

वय्कःयाथाय् वयेत

थथःम्ह तुं

तयार जुयाचवने धुंकल।

8 वयात तसकं प्वाला

प्वाला थीगु, यचुसे च्वंगु,

बांलाःगु सुति कापतं

पुंका तःगु दु।”

(बांलाःगु सूती कापः विश्वासीतयगु बांलाःगु भिंगु ज्याखँ खः।)

9 अले व स्वर्गदूतं जितः धाल — “थ्व च्वयाति, चीधिकःम्ह भ्याःचायागु  
ब्याहायागु भ्वजय् सःतूपि मनूत तसकं हे धन्यपि खः।”

वं हानं धाल — “थ्व फुक्क परमेश्वरयागु सत्य वचन खः।”✧

10 अथे धाःगुलि वयात हनाबना यायेत जि वयागु तुतिइ भ्वपुला। अयनं वं  
धाल — “छं थथे याये मते। येशूयागु वचन न्यनाकाःपि छ व छिमि दाजुकिजापि  
थें जिं नं परमेश्वरया छम्ह दास खः। परमेश्वरयात आराधना या।” येशूयागु साक्षी  
अगमवक्तातयगु आत्मा खः।

✧ 19:5 १९:५ भज ११५:१३

✧ 19:6 १९:६ इज १:२४; भज ९३:१; ९७:१; ९९:१

✧ 19:9 १९:९



तुयुम्ह सल गयादीम्ह

11 थुलि जुइ धुंका: स्वर्ग चाल, जिं अन छम्ह तुयुम्ह सलयात खना। व सल गया च्वंम्हयसित विश्वास याये बहःम्ह व सत्यम्ह धाइ। वय्कलं बांलाक सत्य कथं न्याय व लडाइँ यानादी।☆

12 वय्कःयागु मिखा मित्या: थें च्वं। वय्कःयागु छेनय् यक्व हे श्रीपिच दु। वय्कःयागु म्हय् च्वयातःगु नां सुनानं हे मस्य्, वय्कलं जक स्यू।☆

13 वय्कलं हिइ थुनातःगु वसः पुनातःगु दु। अले वय्कःयात परमेश्वरयागु वचन धका: नां तया तल।

14 यचुसे च्वंगु, तुयुगु, बांलाःगु सुति वसतं पुनातःपिं स्वर्गय् च्वंपिं तुयुगु सल गया च्वंपिं सिपाइँत फुक्कं वय्कःया ल्यूल्यू जुल।

15 जात जातियापिं मनूतयत स्यायेत वय्कःयागु म्हतुं छपु तरवार पिहां वयाच्वंगु दु। अले वय्कलं इमित नँयागु दण्डी राज्य यानादी। दक्वसिबय् तःधंम्ह व शक्ति दुम्ह परमेश्वरयागु तमं जायाच्वंगु दाख तिसिगु थासय् वय्कलं तुति न्हुया: दाखरस पिकयादी।☆

16 वय्कःयागु वसतय् व वय्कःयागु खम्पाय् थ्व नां च्वयातःगु दु – “जुजुतय् नं जुजु व प्रभुतय् नं प्रभु।”

17 अनं लिपा जिं सूर्यलय् दनाच्वंम्ह छम्ह स्वर्गदूतयात खना। आकाशय् ब्वया च्वंपिं फुक्क झंगःतयत ततसलं वं सःतल – “वा, परमेश्वरयागु तःधंगु भवय् नयेत मुं वा।

18 जुजुपिनिगु, तःधंपिं कप्तानतयगु, बल्लाःपिं मनूतयगु, सलतयगु, सल गया जुइपिनिगु, फुक्क मनूतयगु, दासतयगु, दास मखुपिनिगु, तःधंपिनिगु व चिधंपिनिगु ला नयेत मुं वा।”☆

19 सल गया च्वंम्ह व वय्कःया सिपाइँत नाप ल्वायेत व पशु व पृथ्वीयापिं जुजुपिं व इमि फुक्कं सिपाइँत मुनावःगु जिं खना।

20 अले व पशुयात व वया फताहा अगमवक्तायात ज्वन। व पशुयागु चिं दुपिन्त व पशुयागु मूर्तियात पुजा याःपिन्त चिं क्यना: थगय् याःम्ह थ्व हे खः। गन्धक जक च्यानाच्वनीगु मि गालय् थुपिं निम्हयसितं क्वफात।☆

21 सल गया च्वंम्हयसिगु म्हतुं पिहां वयाच्वंगु तरवारं ल्यंदनिपिं फुक्कसितं स्याना छवत। इमिगु ला नया: फुक्क झंगःतयसं प्वा: जाय्कल।

☆ 19:11 १९:११ इज १:१; भज १६:१३; यशै ११:४

☆ 19:12 १९:१२ दान १०:६

☆ 19:15

१९:१५ भज २:१; यशै ६३:३; योए ३:१३; प्रका १४:२०

☆ 19:18 १९:१७-१८ इज ३९:१७-२०

☆ 19:20

१९:२० प्रका १३:१-८

## 20

शैतानयात द्रुःछि देँ तक चिनातःगु

1 अले जिं तसकं तःजाःगु गाःयागु ताःचा व तःपुगु सिखः छपु ल्हातिइ ज्वनाः स्वर्गं क्वहां वयाच्चंम्ह छम्ह स्वर्गदूतयात खना।

2 अजिङ्गर धाःसां ज्यूम्ह, पुलांम्ह सर्प धाःसां ज्यूम्ह, दुष्ट व शैतान धाःसां ज्यूम्हयसित व स्वर्गदूतं ज्वनाः द्रुःछि देँ तक चिनातल।☆

3 अले गालय् वान्छवयाः पुसा तिनाः छाप तयाबिल। द्रुःछि देँ मफुतले वं जात जातियापिं मनूतयूत थगय् मयायेमा धकाः थथे याःगु खः। द्रुःछि देँ दये धुंकाः वयात पलख त्वःती।

4 अले जिं यक्व सिंहासन व उकी न्याय यायेगु अधिकार दुपिं फ्यतुनाच्वंगु खना। येशूयागु साक्षीया निति, परमेश्वरयागु वचनया निति छ्यं धयंकूपिं नं जिं खना। इमिसं व पशुयात व पशुयागु मूर्तियात पुजा मयाः, अले कपालय् नं, ल्हातिइ नं पशुयागु चिं तया मतः। इमिसं म्वाना वयाः ख्रीष्टनापं द्रुःछि देँ तक राज्य यात।☆

5 द्रुःछि देँ फुना मवतले ल्यंदनिपिं सीपिं म्वाना मवः, सीपिं म्वानावःगु थ्व न्हापांगु खः।

6 सीपिं म्वाना वःगुली ब्वति काये दुम्ह मनु धात्थे हे धन्यम्ह व पवित्रम्ह खः। थुपिं हानं सी माली मखु, बरु थुपिं परमेश्वर व ख्रीष्टया पुजाहारीत जुयाच्वने दइ। अले वय्कः नाप इमिसं नं द्रुःछि देँ तक राज्य याये खनी।

शैतान बूगु

7 द्रुःछि देँ फुइवं शैतानयात कुना तःगु थासं त्वःताबी।

8 वं सारा संसारय् च्वपिं जात जातियापिं मनूतयूत अर्थात “गोग” व “मागोगपिन्त” झंगः लानाः ल्वाकेत छथाय् मुंकी। इपिं समुद्रयागु फि थें यक्व दु।☆

9 अले इमिसं सारा संसारय् वनाः विश्वासीतयूत व परमेश्वरयात तसकं यःगु शहरयात घेरा तल। अले स्वर्गं मि कुतुं वयाः इपिं भम्म जुल।

10 इमित थगय् याना जूम्ह शैतानयात ज्वनाः गन्धकयागु मि गालय् क्वफानाबिल। पशु व फताहा अगमवक्तायात नं अन हे क्वफाना तःगु दु। इमित अन सदां चच्छि न्हिच्छिं सास्ती याना तइ।

## दक्वसिबय् लिपायागु न्याय

11 अनं लिपा जिं तःधंगु तुयुगु सिंहासन व उकी पयतुना च्वंमहयसित खना। वय्कःयात खनाः आकाश व पृथ्वी मदयावन। अले इमित च्वनेत गनं हे थाय् मन्त।

12 अले जिं सिंहासनयागु न्ह्यःने तःधंषिं व चिधंषिं सीपिं दनाच्चंगु व सफूत पुइकातःगु खना। मेगु छगू सफू नं पुइकल, थ्व सफू जीवनयागु सफू खः। अले इमिसं याःगु ज्या स्वयाः जीवनयागु सफुलिइ च्वया तः थें सीपिं फुक्कसित न्याय यात।\*

13 समुद्रं समुद्रय् सीपिं फुक्कं लित बिल, मृत्यु व पातालं सीपिं फुक्कं लित बिल। थुकथं इमिसं यानावःगु थथःगु ज्या स्वयाः इमित न्याय यात।

14 अले मृत्यु व पातालयात नं मि गालय् वांछवल। थ्व मि गाः धयागु हे निकः सीगु खः।

15 जीवनयागु सफुलिइ नां च्वया मतःपिं फुक्कसितं मि गालय् वांछवल।

## 21

## न्हगु स्वर्ग व न्हगु पृथ्वी

1 थुलि जुइ धुंकाः जिं न्हगु स्वर्ग व न्हगु पृथ्वी खना। न्हापायागु स्वर्ग व पृथ्वी मदयावने धुंकल। समुद्र द हे मन्त।\*

2 न्हगु पवित्रगु यरूशलेम शहर स्वर्ग परमेश्वरपाखें क्वहां वयाच्चंगु जिं खना। थ्वयात बिया छवयेत्यंमह भमचायात थें समाः यानातःगु दु।\*

3 सिंहासनं तःसलं थथे धकाः धयाहःगु सः जिं ताल – “स्व, आः परमेश्वर मनूतलिसे दी। वय्कः इपिं नाप हे च्वनादी। इपिं वय्कःया मनूत जुइ। परमेश्वर थः हे इमि परमेश्वर जुयाः इपिं लिसे च्वनादी।\*

4 वय्कलं इमिगु मिखाय च्वंगु ख्वबि सुचुक हयादी। आः अन इपिं सी माली मखुत, दुःखं च्वने म्वाःल, ख्वय् म्वाःल, अले छुं नं दुःख जुइ मखुत। पुलांगु ज्याखँ फुक्कं मदयावने धुंकल।”\*

5 अले सिंहासनय् पयतुनादीमहयसिनं धयादिल – “स्व, जिं फुक्कं न्हगु यानाबी।” वय्कलं हानं धयादिल – “थ्व च्वयाति, छायाधाःसा थ्व फुक्क वचन विश्वास याये बहःगु खः, अले सत्य नं खः।”

☆ 20:12 २०:११-१२ दान ७:९-१० ☆ 21:1 २१:१ यशै ६५:१७; ६६:२२; २ पत्र ३:१३ ☆ 21:2 २१:२ यशै ५२:१; ६१:१०; प्रका ३:१२ ☆ 21:3 २१:३ इज ३७:२७; लेवी २६:११-१२ ☆ 21:4 २१:४ यशै २५:८; ३५:१०; ६५:१९

6 वयकलं जितः धयादिल – “आः सिधल। अल्फा व ओमेगा जि हे खः। शुरु व अन्त जि हे खः। प्याचाःपिन्त जिं जीवनया बुंगाःयागु लः सितिकं त्वंके।”

7 त्याकावइपिन्त थ्व हे अंश दइ। जि वया परमेश्वर जुइ, अले व जिम्ह काय जुइ।

8 “भुस्याःत, विश्वास त्वःतूपिं, घच्चायापुगु ज्या याइपिं, मनू स्याइपिं, व्यभिचार याइपिं, धामी झॉक्री ज्या याइपिं, मूर्ति पुजा याइपिं व मखुगु खँ ल्हाइपिं फुककसितं गन्धकयागु मि गालय् वांछवइ। निकः सीगु धाःगु थ्व हे खः।”

### न्हगु यस्शलेम

9 दुःखकष्ट दुगु ख्वल्चा ज्वनातःपिं न्हय्म्ह स्वर्गदूतत मध्ये दक्वसिबय् लिपायागु दुःखकष्ट दुगु ख्वल्चा कयातःम्हयसिनं वयाः जितः थथे धाल – “थन वा, जिं छन्त भम्चा क्यनाबी। व भम्चा चीधिकःम्ह भ्याःचाया कलाः खः।”

10 जि आत्मां जाल, अले स्वर्गदूतं जितः तःधंगु तःजाःगु पर्वतय् यंकाः परमेश्वरदीगु स्वर्गं क्वहां वयाच्चंगु पवित्रगु शहर यस्शलेम क्यन।

11 व शहर परमेश्वरयागु जलं झल्लल थिनाच्चन, अले तसकं थिकेगु मणि थी थें फुककं खनेदय्कः झल्लल थिनाच्चन।

12 थ्व शहरय् तब्यागु व तःजाःगु पःखाः दनातःगु दु। थ्व पखालय् झिनिद्वाः ध्वाखा तयातःगु दु। ध्वाखाय् झिनिम्ह स्वर्गदूतत च्वनाच्चन। इस्राएलीतय् झिनिगू कुलयागु नां उपि ध्वाखाय् च्वयातःगु दु।

13 पुर्ब पती स्वद्वाः ध्वाखा, उत्तर पती स्वद्वाः ध्वाखा, दच्छिन पती स्वद्वाः ध्वाखा व पच्छिम पती स्वद्वाः ध्वाखा।

14 शहरया पःखाःयागु जग झिनिथाय् दु। उकी घःने चीधिकःम्ह भ्याःचाया झिनिम्ह प्रेरिततय्गु नां च्वयातःगु दु।

15 जि नाप खँ ल्हाःम्हय्सिके शहर, ध्वाखा व पःखाः नापय् यायेत लुँयागु गज दु।

16 शहर प्यकू लाः। हाकः व ब्या उति हे दु। अले वं थःगु गजं शहर नापय् याना स्वःबलय् निद्रुः व प्यसः किलोमिटर हाक दु। ब्या व जाः नं उलि हे दु।

17 स्वर्गदूतं व शहरयागु पःखाः नं नापय् याना स्वःबलय् खड्गु मिटर दु।

☆ 21:6 २१:६ यशै ५५:१ ☆ 21:7 २१:७ २ शमू ७:१४; भज ७:२६-२७ ☆ 21:10 २१:१० इज ४०:२ ☆ 21:13 २१:१२-१३ इज ४८:३०-३५ ☆ 21:15 २१:१५ इज ४०:३

18 पःखाः जास्परं दय्कातःगु खः। शहर न्हाय्कं थें यचुसे च्वंगु लुं दय्कातःगु खः।

19 पःखाःयागु जग तःजिगु थीथी मणि, हिरा, मोती बांलाकातःगु दु। न्हापांगु जास्परयागु, निगूगु निलमयागु, स्वंगूगु हरितयागु, प्यंगूगु पन्नायागु,

20 न्यागूगु आनिक्सयागु, खुगूगु कार्नेलेनयागु, न्हयगूगु गोमेडयागु, च्यागूगु पिरोजायागु, गुंगूगु पुष्पराजयागु, झिगूगु लसुनेयागु, झिंछगूगु यूयागु, झिंनिगूगु कटेलायागु खः।

21 व झिंनिद्राः ध्वाखा झिंनिगः मोतीयागु खः। छद्दाः ध्वाखा छगः मोती दय्कातःगु खः। शहरयागु लँ न्हाय्कं थें यचुसे च्वंगु मुक्कं लुँयागु दय्कातःगु खः।\*

22 अन शहरय् जिं देगः छगः हे मखना। अनयागु देगः हे दक्व शक्ति दुम्ह परमप्रभु परमेश्वर व चीधिकःम्ह भ्याःचा खः।

23 उकिं अन शहरय् झल्लल थीकेत सूर्यं नं म्वाः तिमिला नं म्वाः।\* परमेश्वरया महिमां हे व शहर झल्लल थ्यू। अनयागु मत चीधिकःम्ह भ्याःचा थः हे खः।

24 थुकियागु जलय् जात जातियापिं मनूत जुइ। अले संसारयापिं जुजुपिन्सं थःगु सम्पत्ति व महिमा अन हे हइ।\*

25 अनयागु ध्वाखा गुबलें हे ति मखु। अन चा धयागु द हे मदु।

26 जात जातियापिं मनूतय्सं थःगु महिमा व हनाबना दक्वं अन हे हइ।\*

27 पवित्र मजूगु छुं हे अन दुकाइ मखु। घच्चायापुसे च्वंगु ज्याखँ यानाजुइपिं, अथवा मखुगु खँ ल्हानाजुइपिं सुं हे अन दुकाइ मखु। भ्याःचायागु जीवनयागु सफलिइ च्वयातःपिं मनूतयत जक अन दुकाइ।\*

## 22

### जीवन बीगु खुसि

1 अले स्वर्गदूतं जितः स्फटिक थें यचुसे च्वंगु अनन्त जीवन बीगु लः दुगु खुसि क्यनाबिल। थ्व खुसि परमेश्वर व चीधिकःम्ह भ्याःचायागु सिंहासनं पिचायाः\*

\* 21:21 २१:१८-२१ यशै ५४:११-१२ \* 21:23 २१:२३ यशै ६०:१९-२० \* 21:24 २१:२४ यशै ६०:३ \* 21:26 २१:२५-२६ यशै ६०:११ \* 21:27 २१:२७ यशै ५२:१; इज ४४:९ \* 22:1 २२:१ इज ४७:१; जक १४:८

2 उगु शहरयागु लँ दथुं न्ह्यानाच्चंगु दु। थ्व खुसि सिथय् झिंनिलाया झिंनिता हे फल सइगु जीवनयागु सिमा दु। थ्व सिमाय् लच्छिइ छता फल सइ। थ्व सिमायागु हः जात जातियापिं मनूतय्त लाय्केगु निरिति वासः खः।✧

3 अन सराः बियातःगु लुं हे नं दइ मखुत।✧ परमेश्वर व चीधिकःम्ह भ्याःचायागु सिंहासन अन दइ। अले वय्कःया दासतय्सं वय्कःयात आराधना याइ।

4 इमिसं वय्कःयागु ख्वाः स्वये दइ। वय्कःयागु नां इमिगु कपालय् च्वयातःगु दइ।

5 अन चा धयागु हे दइ मखु। इमित मतयागु जः व सूर्ययागु जः माःगु मखुत। परमप्रभु परमेश्वरं हे इमित जः बियादी। इमिसं न्ह्याबलें राज्य यानाच्चवनी।✧

### प्रभु येशू हानं झाइ

6 अले स्वर्गदूतं जितः धाल – “थ्व वचन फुक्कं सत्य व विश्वास याये बहःगु खः। अगमवक्तातय्त आत्मा बियादीम्ह परमप्रभु परमेश्वरं थः दासतय्त याकनं जू वइगु खँ क्यनेत थः दूत छवयाहयादीगु दु।”

7 येशू धयादिल – “जि याकनं हे वयेत्यनागु दु। थ्व सफुलिइ च्वयातःगु अगमवाणी फुक्कं न्यनाः शुइकाः मानय् यानाच्चवनीम्ह धात्थें धन्यम्ह खः।”

8 थ्व खंम्ह व ताःम्ह जि यूहन्ना खः। जिं थथे स्वये धुंकाः व न्यने धुंकाः थ्व फुक्क क्यना ब्यूम्ह स्वर्गदूतयात हनाबना यायेत भवपुला।

9 वं जितः धाल – “छं थथे याये मते। छ व छिमि अगमवक्ता दाजुकिजापिं व थ्व सफुलिइ च्वंगु वचन मानय् यानाच्चवंपिं थें जि नं छम्ह परमेश्वरया दास खः। परमेश्वरयात आराधना या।”

10 वं जितः हानं थथे धाल – “थ्व सफुलिइ च्वयातःगु अगमवाणी सुचुकातये मते, छाय्धाःसा ई न्ह्यःने थ्यने धुंकल।

11 मभिंगु ज्या याइम्हयसित मभिंगु ज्या हे याका ति। घच्चायापुगु ज्या यानाजुइम्ह अझ घच्चायापुगु ज्या याना जुयाच्चवनेमा। बांलाःगु भिंगु यानाजुइपिन्त अझ नं बांलाःगु भिंगु याका हे ति। पवित्रपिन्त अझ पवित्र जुइका ति।”✧

✧ 22:2 २२:२ उत २:१; इज ४७:१२ ✧ 22:3 २२:३ जक १४:११ ✧ 22:5 २२:५ यशै ६०:१९; दान ७:१८ ✧ 22:11 २२:११ दान १२:१०

12 “स्व, जि याकनं हे वयेत्यनागु दु। मनूतयगु ज्या स्वयाः जिं इमित बीमाःगु इनाम बी।”☆

13 अल्फा व ओमेगा जि हे खः। न्हापायाम्ह व लिपायाम्ह, अले शुरू व अन्त जि हे खः।”☆

14 थथःगु वसः हियाः यचुसे च्वंक च्वना च्वनीपिं धन्यपिं खः। जीवनयागु सिमाय् सःगु फल इमिसं नयेखनी, अले इपिं ध्वाखां दुने शहरय् नं वने खनी।☆

15 शहरं पिने धाःसा घच्चायापुगु ज्या याइपिं, जादु क्यनिपिं, व्यभिचार याइपिं, ज्यानमारात, मूर्ति पुजा याइपिं, मखुगु ज्याखँ यायेगु यय्कीपिं व मखुगु ज्याखँ जक यानाजुइपिं दइ।

16 “मण्डलीतयत् थ्व खँ धायकेत जि येशू छन्थाय् जिम्ह स्वर्गदूत छवयाहयागु खः। जि दाऊदया कुल व सन्तान खः। सुथय् थीगु नगु नं जि हे खः।”☆

17 आत्मा व भम्चां धयादी – “झासँ।” अथे हे न्यनीपिन्सं नं “झासँ” धकाः धा। प्याचाःपिन्सं व इच्छादुपिन्सं वयाः जीवनयागु लः सितिकं त्वँ।☆

18 थ्व सफुलिइ च्वयातःगु अगमवाणी न्यंपिं फुक्कसितं जिं ख्याच्वः बी – सुनानं थुकी छुं खँ तन धाःसा वयात परमेश्वरं थ्व सफुलिइ च्वयातःगु महामारी तनादी।

19 सुनानं थ्व अगमवाणीयागु सफुलिइ च्वंगु छुं वचन लिकाल धाःसा परमेश्वरं वयागु जीवनयागु सिमायागु फलया भाग नं मदय्कादी। अले वयात पवित्र शहरं पितिनी।☆

20 थुकियागु साक्षी बियादीम्हय्सिनं धयादिल “धात्थें हे जि याकनं वयेत्यनागु दु।”

आमेन, झासँ हे प्रभु येशू।

21 प्रभु येशूयागु दया माया फुक्कसित दयेमा। आमेन।

☆ 22:12 २२:१२ यशै ४०:१०; ६२:११; भज २८:४; यर १७:१० ☆ 22:13 २२:१३ प्रका १:८,१७; २:८; यशै ४०:६; ४८:१२ ☆ 22:14 २२:१४ उत २:१; ३:२२ ☆ 22:16 २२:१६ यशै ११:१,१० ☆ 22:17 २२:१७ यशै ५५:१ ☆ 22:19 २२:१८-१९ व्य ४:२; १२:३२

**Newar**  
**Newar: Newar (Bible)**

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

---

PDF generated using Haiola and XeLaTeX on 16 May 2025 from source files  
dated 17 May 2025

838cc630-4ccf-5055-be45-10a98a141cc7